

全五代詩

附補遺

五



全 五 代 詩

附 補 遺

(五)

李 調 元 編

叢書集成

初編

主編者
王雲五

商務印書館發行

全五代詩卷二十五

南唐

李建勳

建勳字致堯，隴西人。少好學，能屬文。尤工詩。南唐主李昇鎮金陵，用爲副使，預禪代之策。拜中書侍郎同平章事。昇元五年，放還私第。嗣主璟召拜司空，尋以司徒致仕。賜號鍾山公。集二十卷。

馬書本傳：建勳以司徒致仕，賜號鍾山公。先是宋齊邱退居青陽，號九華先生，未幾一徵而起，時論薄之。建勳同爲詩以見志曰：桃花流水須相信，不學劉郎去又來。建勳博覽經史，其爲詩清淡平易，見稱于時。南唐近事，馮延魯出師

國中，催督軍糧，急如星火。李建勳寄詩云：粟多未必爲全計，師老須防有伏兵。旣而果爲越人所敗，及歸，還司空，累表乞致政。自稱鍾山公，詔授司徒，不起。學士湯悅致狀賀之。建勳以詩答曰：空徒猶不作，爭敢作司徒。幸有山公號，如何不見呼。又建勳鎮臨川日，九江帥周宗以書來，誚以赴鎮。日近，器用儀注或闕，欲輟臨川者。李冠醉批一絕句云：偶罷阿衡來典郡，固無閒物可應官。馮君爲報周公道，莫作尋常刺史看。青瑣集：建勳年八十，謁宋齊邱于洪州，題信果觀壁云：春來流水漲而活，曉起西山勢以行。玉洞主人經規在，攬竿步步就長生。歸高安無病而卒。南唐書方術傳：李子善吹中管，當座吹噓，聲韻悠揚，清入霄漢。元宗聞其名，未幾召見。李建勳以詩送之曰：勻如春澗長流水，怨似秋枝欲斷蟬。可惜人間容易聽，清聲不到御樓前。詩話總龜：建勳鎮臨川，賞牡丹，有小吏捧硯，舉止有士人風。公曰：學詩乎？對曰：竊親筆硯，因令口占一篇。有云：三月能辭千日醉，一生能得幾回看。公奇之，勉令就學，因成詩名。全唐詩：建勳有柏梁隔句韻詩云：不喜長亭柳

枝枝疑送君。惟憐北窗下。樹樹解留人。圓缺都如月。東西只似雲。愁看離席散。歸蓋動行塵。又有送八分書與友人。繼以詩云。跑馬爲詩跑馬書。不封將去寄仙都。仙翁拍手應相笑。得似秦朝次仲無。吟窗雜錄。建勳有留別鍾山句云。徧尋雲壑重題石。欲下山門更倚松。

迎神曲

攔轡罷吟塞笛。女巫結束分行立。空中再拜神且來。滿奠椒漿齊獻揖。陰風宰宰吹紙錢。妖巫瞑目傳神言。與君降福爲豐年。莫教賽祀虧常筵。

惜花寄孫員外

朝始一枝開。暮復一枝落。只恐雨淋漓。又見春蕭索。侵晨結驪櫺酒徒。尋芳踏盡長安衢。思量少壯不自樂。他日白頭空歎吁。

白雁

東溪一白雁。毛羽何皎潔。薄暮浴清波。斜陽共明滅。差池失羣久。幽獨依人切。旅食賴菰蒲。單棲怯霜雪。邊風昨夜起。顧影空哀咽。不及牆上烏。相將繞雙闕。

感故府二首

戚戚復戚戚。期懷安可釋。百年金石心。中路生死隔。新墳應草合。舊地空苔色。白日燈熒熒。凝塵滿几席。悒悒復悒悒。思君安可及。永日在階前。披衣隨風立。高樓暮角斷。遠樹寒鴉集。惆悵幾行書。遺蹤墨猶溼。

春陰

老雨不肯休。東風勢還作。未放草蒙茸。已遣花蕭索。浮生何苦勞。觸事妨行樂。寄語達生人。須知酒勝藥。

細雨遙懷故人

江雲未散東風暖。溼溼正在高樓見。細柳緣堤少過人。平蕪隔水時飛燕。我有近詩誰與和。憶君狂醉愁難破。昨夜南窗不得眠。閑塔點滴迴燈坐。

中酒寄劉行軍

甚矣頻頻醉。神昏體亦虛。肺傷徒問藥。髮落不盈梳。戀寢嫌明室。修生媿道書。西峯老僧語。相勸合何如。

早春寄懷

家山歸未得。又是看春過。老覺光陰速。閑悲世路多。風和吹岸柳。雪盡見庭莎。欲向東溪醉。狂眠一放歌。

春日東山草堂作

身閑贏得出。天氣漸喧和。蜀馬登山穩。南朝古寺多。早花微弄色。新酒欲生波。從此唯行樂。閑愁奈我何。

春日小園晨看兼招同舍

最有杏花繁。枝枝若手搏。須知一春促。莫厭百迴看。鳥囀風潛息。蜂遲露未乾。可容排飲否。兼折贈頭冠。

春日病中

纔得歸閑去。還教病臥頻。無由全勝意。終是負青春。綠柳漸拂地。黃鶯如喚人。方爲醫者勸。斷酒已經旬。

殿妓

自爲專房甚。忽忽有所傷。當時心已悔。徹夜手猶香。恨枕堆雲髻。啼襟搵月黃。起來猶忍惡。剪破繡鴛鴦。

踏青罇前

期君速行樂。不要旋還家。永日雖無雨。東風自落花。詩毫黏酒淡。歌袖向人斜。薄暮忘歸路。垂楊噪亂鴉。

正月晦日

莫倦尋春去。都無百日遊。更堪正月過。已是一分休。泉暖聲纔出。雲寒勢未收。晚來重作雪。翻爲杏花愁。

惜花

白髮今如此。紅芳莫更催。預愁多日謝。翻怕十分開。點滴無時雨。荒涼滿地苔。閑罇一榼酒。惟待故人來。

金谷園落花

愁見清明後。紛紛蓋地紅。惜看難過日。自落不因風。蝶散餘香在。鶯啼半樹空。堪悲一尊酒。從此似西東。

柳花寄朱明府

每愛江城裏。青春向盡時。一迴新雨歇。是處好風吹。破石黏蟲網。高樓撲酒旗。遙知陶令宅。五樹正離披。

送人

相見未逾月。堪悲遠別離。非君誰顧我。萬里又南之。雨逼清明日。花陰杜宇時。愁看挂帆處。鷗鳥共遲遲。

閑遊

送喻鍊師歸茅山

攜酒復攜觴。朝朝一似忙。馬諳頻到路。僧借舊眠床。道勝他圖薄。身閑白日長。扁舟動歸思。高處見滄浪。

春日金谷園

火急召親賓。歡遊莫厭頻。日長徒似歲。花過卽非春。晚雨來何定。東風自不勻。須知三箇月。不是負芳晨。

夏日酬祥松二公見訪

多謝空門客。時時出草堂。從容非有約。淡薄不相忘。池映春篁老。簷垂夏果香。西峯正清霽。自與拂吟床。

懷贈操禪師

嘗憶曹溪子。龕居面碧嵩。杉松新夏後。雨雹夜禪中。道匪因經悟。心能向物空。秋來得音信。又在剡山東。

閑居秋思呈祥松二公

秋光雖卽好。客思轉悠哉。去國身將老。流年雁又來。葉紅堆晚徑。菊冷藉空臺。不得師相訪。難將道自開。

賦得冬日青溪草堂

莫道無幽致。常來到日西。地雖當北闕。天與設東溪。疎葦寒多折。驚鳬去不齊。坐中皆作者。長愛覓分題。

溪齋

水木遶吾廬。峩簾晚檻虛。衰條寒露鵲。幽果落驚魚。愛酒貧還甚。趨時老更疎。乖慵自有素。不是忽簪裾。

小園

小園吾所好。栽植忘勞形。晚果經秋赤。寒蔬近社青。竹蘿荒引蔓。土井淺生萍。更欲從人勸。憑高置草亭。

宿山房

石窗燈欲盡。松檻月還明。就枕渾無睡。披衣卻出行。巖高泉亂滴。林動鳥時驚。倏忽山鐘曙。喧喧僕馬聲。

金陵所居青溪草堂閑興

窗外皆連水。杉松欲作林。自憐趨競地。獨有愛閑心。素壁題看遍。危冠醉不簪。江僧暮相訪。簾卷見秋岑。

寄魏郎中

碌碌但隨羣。蒿蘭任不分。未嘗矜有道。求遇向吾君。逸駕秋尋寺。長歌醉望雲。高齋紙屏古。塵暗北山文。

病中書懷寄王二十六

落葉滿山州。閑眠病未瘳。窗陰連竹枕。藥氣染茶甌。路匪人遮去。官須自覓休。焉見更羸老。扶杖作公侯。

採菊

簇簇竟相鮮。一枝開幾番。味甘資麪藥。香好勝蘭蓀。古道風搖遠。荒籬露壓繁。盈筐時採得。服餌近知門。

孤雁

欲食不敢食。合栖猶未栖。聞風亦驚過。避繳恨飛低。水闊緣湘困。雲寒過磧迷。悲鳴感人意。不見夜烏啼。

贈送致仕郎中

鶴立瘦稜稜。髭長白似銀。衣冠皆古製。氣貌異常人。聽雪添詩思。看山滯酒巡。西峯重歸路。唯許野僧親。
宿友人山居寄司徒相公

雨雪正霏霏。令人不憶歸。地爐僧坐暖。山磴火聲肥。隔紙烘茶葉。移鐙剝芋衣。知君在霄漢。此興得還稀。
郢客相尋夜。荒庭雪灑蒿。虛堂省向曙。吟坐共忘勞。溪凍聲全減。燈寒焰不高。他人莫相笑。未易會吾曹。
田家三

畢歲知無事。兵銷復舊丁。竹門桑徑狹。春日稻畦青。犬吠隈籬落。雞飛上碓程。歸田起□思。蛙叫草冥冥。
不識城中路。熙熙樂有年。木檠擎社酒。瓦鼓送神錢。霜落牛歸屋。禾收雀滿田。遙陂過秋水。閑閣釣魚船。
長愛田家事。時時欲一過。垣籬皆樹槿。廳院亦堆禾。病果因風落。寒蔬向日多。遙聞數聲笛。牛晚下前坡。

新竹

嫋嫋薰風軟。娟娟湛露光。參差仙子仗。迤邐羽林槍。迴去侵花地。斜來破薜牆。籊乾猶抱翠。粉膩若塗裝。
逕曲葦難數。陰疎葉未長。嫋嫋吟客倚。甘畏夏蟲傷。映水如爭立。當軒自著行。北亭尊酒興。還爲此君狂。
歸燕詞

羽翼勢雖微。雲霄亦可期。飛翻自有路。鴻鵠莫相嗤。待侶臨書幌。尋泥傍藻池。衝人穿柳徑。捕蝶遶花枝。
廣廈來應徧。深宮去不疑。雕梁聲上下。烟浦影參差。舊地人潛換。新巢雀謾窺。雙雙暮歸處。疎雨滿江湄。
題魏壇二首

不遇至真傳道要。曾看真誥亦何爲。舊碑經亂沈荒澗。靈篆因耕出故基。蛙黽自喧澆藥井。牛羊閑過放生池。蕭條夕景空壇畔。朽檜枝斜綠蔓垂。
一尋遺跡到仙鄉。雲鶴沈沈思渺茫。丹井歲深生草木。芝田春廢臥牛羊。雨淋殘晝摧荒壁。鼠引飢蛇落壞梁。薄暮欲歸仍佇立。菖蒲風起水泱泱。

東樓看雪

一上高樓醉復醒。日西江雪更冥冥。化風吹火全無氣。平望惟松別露青。臘內不妨南地少。夜長應得小窗聽。因思舊隱匡廬日。閑看杉檉掩石扃。

落花

惜花無計又花殘。獨遶芳叢不忍看。暖豔動隨鶯翅落。冷香愁雜燕泥乾。綠珠倚檻魂初散。巫峽歸雲夢又闌。忍把一尊重命樂。送春招客亦何歡。

春雪

南國春寒朔氣迴。霏霏還阻百花开。全移暖律何方去。似誤新鶯昨日來。平野旋銷難蔽草。遠林高綴卻遮梅。不知金勒誰家子。只待晴明賞帝臺。

重戲和春雪寄沈員外

誰道江南要雪難。半春猶得倚樓看。卻遮遲日偷鶯暖。密灑西風借鶴寒。散漫不容梨豔去。輕明應笑玉

華乾。和來瓊什雖無敵。且是儂家比興殘。

春日尊前示從事

州中案牘魚鱗密。界上軍書竹節稠。眼底好花渾似雪。甕頭春酒漫如油。東君不爲留遲日。清鏡唯知促白頭。最覺此春無氣味。不如庭草解忘憂。

尊前

官爲將相復何求。世路多端早合休。漸老更知春可惜。正歡唯怕客難留。雨催草色還依舊。晴放花枝始自由。莫厭百壺相勸倒。免教無事結閑愁。

薔薇二首

萬藥爭開照檻光。詩家何物可相方。錦江風撼雲霞碎。仙子衣飄黼黻香。裊露早英濃壓架。背人狂蔓暗穿牆。綵牋蠻榼句休日。欲召親賓看一場。

拂簷拖地對前墀。蝶影蜂聲爛熳時。萬倍馨香勝玉藥。一生顏色笑西施。忘歸醉客臨高架。恃寵佳人索好枝。將並舞腰誰得及。惹衣傷手盡從伊。

殘牡丹

腸斷題詩如執別。芳茵愁更繞闌鋪。風飄金藥看全落。露滴檀英又暫蘇。失意婕妤妝漸薄。皆身妃子病難扶。迴看池館春休也。又是迢迢看畫圖。

春雨二首

春霖未免妨遊賞。唯到詩家自有情。花徑不通新草合。蘭舟初動曲池平。淨緣高樹莓苔色。飢集虛廊燕雀聲。閑憶昔年爲客處。悶留山館阻行行。蕭蕭春雨密還疎。景象三時固不如。寒入遠林鶯翅重。暖抽新麥土膏虛。細濛臺榭微兼日。潛漲漣漪欲動魚。唯稱乖慵多睡者。掩門中酒覽閑書。

醉中惜花更書與諸從事

公退尋芳已是遲。莫因他事更來稀。未經旬日唯憂落。算有開時不合歸。歌檻宴餘風裊裊。閑園吟散雨霏霏。高樓鼓絕重門閉。長爲拋迴恨解衣。

和判官喜雨

去禱山川尚未還。雲雷尋作遠聲寒。人情便似秋登悅。天色休勞夜起看。高檻氣濃藏柳郭。小庭流擁沒花壇。須知太守重牆內。心極農夫望處歡。

離闕下日感恩

二年塵冒處中台。喜得南歸退不才。卽路敢期皇子送。出關猶有御書來。未知天地恩何報。翻對江山思莫開。斜日章汀凝立處。遠波微颺翠如苔。

春水

萬派爭流雨過時。晚來春靜更逶迤。輕鷗散遶夫差國。遠樹微分夏禹祠。青岸漸平濡柳帶。舊溪應暖負
蓴絲。風鬟倚櫂誰家子。愁看鴛鴦望所之。

蝶

粉蝶翩翩若有期。南園長是到春歸。閑依柳帶參差起。困傍桃花獨自飛。潛被燕驚還散亂。偶因人逐入
簾幃。晚來欲雨東風急。迴看池塘影漸稀。

中春寫懷寄沈彬員外

省從騎竹學謳吟。便帶光陰役此心。寓目不能閑一日。閉門長勝得千金。窗懸夜雨殘燈在。庭掩春風落
絮深。唯有故人同此興。近來何事嬾相尋。

鍾山寺避暑

樓臺雖少景何深。滿地青苔勝布金。松影晚留僧共坐。水聲閑與客同尋。清涼會擬歸蓮社。沈湎終須棄
竹林。長愛寄吟經案上。石窗秋霽向千岑。

道林寺

雖向鍾峯數寺連。就中奇勝出其間。不教幽樹妨閑地。別著高窗向遠山。蓮沼水從雙澗入。客堂僧自九
華還。無因得結香燈社。空向王門玷玉班。

和致仕沈郎中

欲謀休退尙因循。且向東溪種白蘋。謬應星辰居四輔。終期冠褐作閑人。城中隔日趨朝嬾。楚外千峯入夢頻。殘照晚庭洗醉醺。靜吟斜倚老松身。

閑出書懷

閑遊何用問東西。寓興皆非有所期。斷酒只攜僧共去。看山從聽馬行遲。溪田雨漲禾生耳。原野鶯啼黍熟時。應有交親長笑我。獨輕人事鬢將衰。

寺居陸處士相訪感懷卻寄二三友人

湘寺閑居亦半年。就中昨夜好潸然。人歸遠岫疎鐘後。雪打高杉古屋前。投足正逢他國亂。冥心未解祖師禪。爐烟向冷孤燈下。唯有寒吟到曙天。

春雪

隨風竟日勢漫漫。特地繁於故歲看。幽榭凍黏花屋重。短簷斜溼燕巢寒。閑聽不寐詩魂爽。淨喫無厭酒肺乾。莫道便爲桑麥藥。亦勝焦涸到春殘。

惜花

淡淡西園日又垂。一尊何忍負芳枝。莫言風雨長相促。直是晴明得幾時。心破只愁鶯踐落。眼穿唯怕客來遲。年年使我成狂叟。腸斷紅牋幾首詩。

登昇元閣

登高始覺太虛寬。白雲須知唱和難。雲渡瑣窗金勝澤。月移珠箔水精寒。九天星象簾前見。六代城池直下觀。唯有上層人未到。金烏飛過拂欄干。

宮詞

自遠凝旒守上陽。舞衣頓減舊朝香。簾垂粉閣春將盡。門掩梨花日漸長。草色深濃封禁路。水聲低咽轉宮牆。君王一去不迴駕。皓齒青蛾空斷腸。

晚春送牡丹

攜觴邀客遶朱闌。腸斷殘春送牡丹。風雨數來留不得。離披將謝忍重看。氛氳蘭麝香初減。零落雲霞色漸乾。借問少年能幾許。不須推酒厭枯盤。

歲暮晚泊望廬山不見因懷岳僧呈察判

貪程只爲看廬阜。及到停舟恨頗濃。雲暗半空藏萬仞。雪迷雙瀑在中峯。林端莫辨曾遊路。鳥際微聞向暮鐘。長愧昔年招我入。共尋香社見芙蓉。

重臺蓮

斜倚秋風絕比倫。千英和露染難勻。自爲祥瑞生南國。誰把丹青寄北人。明月幾宵同綠水。牡丹無路出紅塵。憐伊不算多時立。贏得馨香暗上身。

和元宗元日大雪登樓

紛紛忽降當元會。著物輕明似月華。狂瀉玉墀初散絮。密黏官樹未妨花。迴封雙闕千尋峭。冷壓南山萬仞斜。寧意傳來中使出。御題先賜老僧家。

遊棲霞寺

養花天氣近平分。瘦馬來敲白下門。曉色未開山意遠。春容猶淡月華昏。琅琊冷落存遺跡。離舍稀疏帶舊村。此地幾經人聚散。只今王謝獨名存。

春詞

日高閑步下堂階。細草春莎沒繡鞋。折得玫瑰花一朵。憑君簪向鳳皇釵。

竹

瓊節高吹宿鳳枝。風流交我立忘歸。最憐琴瑟斜陽下。花影相如滿客衣。

清明日

他皆攜酒尋芳處。我獨關門好靜眠。唯有楊花似相覓。因風時復到牀前。

宮詞

宮門長閉舞衣閑。略識君王鬢便斑。卻羨落花春不管。御溝流得到人間。

獨夜昨

佳人一去無消息。夢覺香殘愁復入。空庭悄悄月如霜。獨倚闌干伴花立。

補遺

贈趙學士

常欽趙夫子，遠作五侯賓。見面到今日，操心如古人。醉同華席少，吟訪野僧頻。寂寂長河畔，荒齋與廟鄰。留題愛敬寺

野性竟未改，何以居朝廷。空爲百官首，但愛千峰青。南風新雨後，與客攜觴行。斜陽惜歸去，萬壑啼鳥聲。闕下偶書寄孫員外

長安驅馳地，貴賤共悠悠。白日誰相促，勞生自不休。鳳翔雙闕曉，蟬噪六街秋。獨有南宮客，時來話釣舟。送王郎中之官吉水

南望廬陵郡，山連五嶺長。吾君憐遠俗，從事輟名郎。移戶多無土，春蠶不滿筐。惟應勞贊畫，溪峒話彊梁。醉中詠梅花

十月清霜尚未寒，雪英重疊已如搏。還悲獨詠東園裏，老作南州刺史看。北客見皆驚節氣，郡僚擬欲望盃盤。交親罕至長安遠，一醉如泥豈自歡。

梅花寄所親

一氣才新物未知，每慙青律與先吹。雪霜迷素猶嫌早，桃杏雖紅且後時。雲鬢自粘飄處粉，玉鞭誰指出牆枝。老夫多病無風味，只向樽前詠舊詩。

雪有作

霏霏奕奕滿寒空。況是難逢值臘中。未白已堪張宴會。漸繁偏好去簾櫳。庭莎易集看盈地。池柳難裝旋逐風。長愛清華入詩句。預愁遲日放消融。

遊宋興寺東巖

幾年不到東巖下。舊住僧亡屋亦無。寒日蕭條何物在。朽松經燒石池枯。

全五代詩卷二十六

南唐

徐鉉

鉉字鼎臣，廣陵人。十歲能屬文，與韓熙載齊名。江南謂之韓徐。起家吳校書郎，已事李昇父子。試知制誥，貶泰州司戶掾。俄遷祠部郎中，復知制誥，召爲太子右諭德，遷中書舍人。後主時，除禮部侍郎，通署中書省事。歷尚書右丞、兵部侍郎、翰林學士、御史大夫、吏部尚書。歸宋，爲直學士院，給事中，散騎常侍。淳化初，坐累黜，靜難軍司馬卒。有騎省集三十卷。

隱居詩話：梅聖俞贈鄰居詩：壁隙透燈光，籬根分井

口。徐鉉亦有喜李少保下鄰云：井泉分地脈，砧杵共秋聲。此句尤閑遠也。隆平集：李穆使江南，見鉉及其弟鉉文章，嘆曰：二陸不及也。騎省集：鉉嘗奉御札賦茱萸詩，御札云：新酒初熟，偶與鄭王諸公開筵于清晏堂，廡之間既覽秋物，復闕霜。賸因賦茱萸一題，以遺此時之興。卿鴻才敏思，不可獨醒，宜應急徵，同賦前旨。鉉因進詩云：萬物慶西成，茱萸獨擅名。芳排紅結小，香透夾衣輕。宿露猶猶重，朝陽照更明。長和菊花酒，高晏奉西清。又和御製詩末云：今朝聖藻偏流詠，黃菊無由更敢迎。又太子宏墓，元宗長子，母爲光穆皇后，先是民間謠曰：有一真人在蘇川，開口張弓向外邊，乃名以應之，以靖難功，立爲太子。顯德六年九月薨，謚文獻。鉉有挽詩云：出處成交讓，經綸有大功。淚碑孤步化，棠樹蔭山東。百揆方時敘，重離遂不融。故臣偏感咽，曾是歎三窮。十國春秋：昭惠后寵嬖專房，創爲高髻纖裳，及首翹髻采之狀。雪夜酣飲，立命箋綰邀醉舞，破又有恨來遲破，怨家山破，故霓裳羽衣曲久不傳，后得殘譜，以琵琶奏之，遂復闌干世。鉉知音，聞于國王，王嘗生問曰：法曲

灼灼傳花枝。紛紛度畫旂。不知紅燭下。照見彩毬飛。借勢因期尅。巫山暮雨歸。

酬郭先輩

太原郭夫子。行高文炳蔚。弱齡負世譽。舉游月窟。仙籍第三人。時人故稱屈。昔余吏西省。傾蓋名籍籍。及我竄羣舒。向風心鬱鬱。歸家暮江上。雲霧一披拂。雷雨不下施。猶作池中物。念君介然氣。感時思奮發。示我數篇文。與古爭馳突。綵繡粲英華。理深刮肌骨。古詩尤精奧。史論皆宏拔。舉此措諸民。何憂民不活。吁嗟吾道窮。與世長迂闊。顧我徒有心。數奇身正絀。論兵厲少年。經國須儒術。夫子無自輕。蒼生正愁疾。

題伏龜山北隅

茲山信岑寂。陰厓積蒼翠。水石何必多。宛有千巖意。孰知近人境。且暮含佳氣。池影搖輕風。林光澹新霽。支頤藉芳草。自足忘世事。未得歸去來。聊爲宴居地。

詠梅子真送郭先輩

忠臣本愛君。仁人本愛民。寧知貴與賤。豈計名與身。梅生爲一尉。獻疏來君門。君門深萬里。金虎重千鈞。向永且不用。況復論子真。拂衣遂長往。高節邈無鄰。至今仙籍中。謂之梅真人。郭生負逸氣。百代繼遺塵。進退生自知。得喪吾不陳。斯民苟有幸。期子一朝伸。

送薛少卿赴青陽

我愛陶靖節。吏隱從絃歌。我愛費徵君。高臥歸九華。清風激頰波。來者無以加。我志兩不遂。漂淪浩無涯。

數奇時且亂。此圖今愈賒。賢哉薛夫子。高舉凌晨霞。安民卽是道。投足皆爲家。功名與權位。悠悠何用誇。攜朋出遠郊。酌酒藉平沙。雲收遠天靜。江闊片帆斜。離懷與企羨。南望長咨嗟。

送高起居之涇縣

右史罷朝歸。之官句水湄。別我行千里。送君傾一卮。酒罷長歎息。此歎君應悲。亂中吾道薄。卿族舊人稀。胡爲佩銅墨。去此白玉墀。吏事豈所堪。民病何可醫。藏用清其心。此外慎勿爲。縣郭有佳境。千峯溪水西。雲樹香迴合。巖巒互蔽虧。彈琴坐其中。世事吾不知。時事寄書札。以慰長相思。

玉笥山留題

仙鄉會應遠。壬事知何極。征傳莫辭勞。玉峰聊一息。形骸已銷散。心想都凝寂。真氣自清虛。非關好松石。九仙皆積學。洞壑多遺跡。遊子歸去來。胡爲但征役。

迴至南康題紫極宮衷道士房

王事信靡盬。飲冰安足辭。胡爲擁征傳。乃至天南陲。天南非我鄉。留滯忽踰時。還經羽人家。豁若雲霧披。何以寬吾懷。老莊有微詞。達士無不可。至人豈偏爲。客愁勿復道。爲君吟此詩。

孟君別後相續寄書作此酬之

多病怯煩暑。知才憂近職。跼足北窗風。遙懷浩無極。故人易成別。詩句空相憶。尺素寄天涯。淦江秋水色。

奉酬度支陳員外

古來賢達士。馳驚唯羣書。非禮誓弗習。違道無與居。儒家若迂闊。遂將世情疏。吾友嗣世德。古風藹有餘。幸遇漢文皇。握蘭佩金魚。俯視長沙賦。栖栖將焉如。

北使還襄邑道中作

九月三十日。獨行梁宋道。河流激似飛。林葉翻如掃。程遙苦晝短。野迴知寒早。還家亦不閑。要且還家了。右省僕射後湖亭閑宴。鉉以宿直先歸。賦詩留獻。

湖上一陽生。虛亭啓高宴。楓林烟際出。白鳥波心見。主人忘貴達。座客容疵賤。獨慚殘照催。歸宿明光殿。

月眞歌

廣陵妓人翰林殷舍人所錄攜之垂訪。鑑上贈此。

楊州勝地多麗人。其間麗者名月眞。月眞初年十四五。能彈琵琶善歌舞。風前弱柳一枝春。花裏嬌鸞百般語。楊州帝京多名賢。其間賢者殷德川。德川初乘綸闈筆。職近名高常罕出。花前月下或遊從。一見月眞如舊識。門庭深院資賢宅。宅門嚴峻無凡客。垂簾偶坐唯月眞。調弄琵琶郎爲拍。殷郎一旦過江去。鏡中嬾作孤鸞舞。朝雲暮雨鎮相隨。石頭城下還相遇。二月三月江南春。滿城濛濛起香塵。隔牆試聽歌一曲。乃是資賢宅裏人。綠窗繡幌天將曉。殘燭依依香裊裊。離腸卻恨苦多情。輾轉重籠空悄悄。殷郎去冬入翰林。九霄宮署轉深沉。人間想望不可見。唯向月眞存舊心。我慙闕茸何爲者。長感餘光每相假。陋巷蕭條正拵扉。相攜訪我衡茅下。我本山人愚且貞。歌筵飲席常無情。自從一見月眞後。至今贏得顛狂名。

殷郎月真聽我語。少壯光陰能幾許。良辰美景數追隨。莫教長說相思苦。

酬喬亞元舍人長歌

亞元舍人不替深知猥貽佳作三篇清絕不敢經。因爲長歌。卿以爲報未竟復得子喬校書示問故兼寄陳君唐資一笑爾。

海陵城裏春正月。海畔朝陽照殘雪。城中有客獨登樓。遙望天邊白銀闕。白銀闕下何英英。雕鞍繡轂趨承明。閨門曉闢旌旗影。玉墀風細佩環聲。此處追飛皆俊彥。當年何事容疵賤。懷鈇畫坐紫微宮。焚香夜直明光殿。王言簡靜官司閑。朋好殷勤多往還。新亭風景如東洛。邱嶺林泉似北山。光陰暗度盍盍裏。職業未妨談笑間。有時邀賓復攜妓。造門不問都非是。酬歌叫笑驚四鄰。賦筆縱橫動千字。任他銀箭轉更籌。不怕金吾司夜吏。可憐諸貴賢且才。時情物望兩無猜。伊余獨稟狂狷性。褊量多言仍薄命。吞舟可漏豈無恩。負乘自貽非不幸。一朝削跡爲遷客。日暮青雲千里隔。離鴻別雁各分飛。折柳攀花兩無色。盧龍渡口問迷津。瓜步山前送暮春。去年三月三十日瓜步隨風。白沙江上曾行路。青林花落何紛紛。漢皇昔幸回中道。昇元中

游之路

極目牛羊臥芳草。舊宅重游盡隳荒。故人相見多衰老。禪智寺。山光橋。風瑟瑟兮雨蕭蕭。行盃已醒

殘夢斷。征途未極離魂消。海陵郡中陶太守。相逢本是隨行舊。乍中拜起已開眉。卻問辛勤還執手。精廬水榭最清幽。一稅征車聊駐留。閉門思過謝來客。知恩省分寬離憂。郡齋勝境有後池。山亭茵閣互參差。有時虛左來相召。舉白飛觴任所爲。多才太守能搗鼓。醉送金船開歌舞。酒酣耳熱眼生花。暫似京華歡

會處歸來旅館還。端居清風朗月夜窗虛。駉駉流景歲云暮。天涯望斷故人書。春來憑檻方歎息。頭仰忽見南來翼。足繫紅箋墮我前。引頸長鳴如有言。開緘試讀相思字。乃是多情喬亞元。短韻三篇皆麗絕。小梅寄意情偏切。

亞元詩云。借問小梅應得信。春風新自海邊來。此篇尤嘉。

不相遺。長卿曾作美人賦。元成今有責躬詩。

鉉去春醉中贈醉妓長歌。酷爲喬君所賞。來篇所引。故以謝之。

報章欲託還京信。筆拙紙窮情未

盡。珍重雲香陳子喬。亦解貽書遠相問。寧須買藥療羈愁。只恨無書消鄙吝。

子喬問藥物所要。又問置新書。故有此句。

游處當時

靡不同。歡娛今日兩成空。天子尙應憐賈誼。時人未要嘲楊雄。曲終筆閣緘封已。翩翩驛騎行塵起。寄向中朝謝故人。爲說相思意如此。

白鷺洲送陳使君

白鷺洲邊江路斜。輕鷗接翼滿平沙。吾徒來送遠行客。停舟爲爾長歎息。酒旗漁艇兩無猜。月影蘆花鎮相得。離筵一曲怨復清。滿座銷魂鳥不驚。人生不及魚禽樂。安用虛名上鱗閣。同心攜手今如此。金鼎丹砂何寂寞。天涯後會眇難期。從此又應添白髭。願君不忘分飛處。長保翩翩潔白姿。

早春左省寓直

旭景鸞臺上。微雲象闕間。時清政事少。日永直官閑。遠籟飛簫管。零冰響珮環。終軍年二十。默坐叩元關。

寒食宿陳公塘上

垂楊界官道。茅屋倚高坡。月下春塘水。風中牧豎歌。折花閑立久。對酒遠情多。今夜孤亭夢。悠揚奈爾何。

將過江題白沙館

少長在維揚。依然認故鄉。金陵佳麗地。不道少風光。稍望吳臺遠。行登楚塞長。殷勤語江嶺。歸夢莫相妨。

早春句假獨直寄江舍人

省署皆歸沐。西垣公事稀。詠詩前砌立。聽漏向中歸。遠思風醒酒。餘寒雨溼衣。春光已堪探。芝蓋共誰飛。

賦得綵燕

縷綵成飛燕。迎和啓蟄時。翠翹生玉指。繡羽拂文楣。誰費銜泥力。無勞剪爪期。化工今在此。翻怪社期遲。

送史館高員外使嶺南

東觀時閑暇。遠修喻蜀書。雙旌馳縣道。百越從軺車。桂蠹晨殫罷。貪泉訪古餘。春江多好景。莫使醉吟疎。

春日紫巖山期客不至

郊外春華好。人家帶碧谿。淺莎藏鴨戲。輕靄隔雞啼。掩映紅桃谷。參緣翠柳堤。王孫竟不至。芳草自萋萋。

愛敬寺有老僧嘗遊長安言秦雍間事歷歷可聽因贈此詩兼示同行客

白首棲禪者。嘗談灞滄游。能令過江客。偏起失鄉愁。室倚桃花崦。門臨杜若洲。城中無此景。將子剩淹留。

寄和州韓舍人

急景駸駸度。遙懷處處生。風頭乍寒暖。天色半陰晴。久別魂空斷。終年道不行。殷勤雲上雁。爲過歷陽城。

春分日

仲春初四日。春色正中分。綠野霏回月。晴天斷續雲。鶯飛猶箇箇。花落已紛紛。思婦高樓晚。歌聲不可聞。

謝文靜墓下作

時閩嶺川師。
契丹陷梁水。

越微稽天討。周京亂虜塵。蒼生何可奈。江表更無人。豈憚尋荒壟。猶思認後身。春風白楊裏。獨步淚霑巾。

和明道人宿山寺

聞道經行處。山前與水陽。磬聲深小院。燈影迴高房。落宿依樓角。歸雲擁殿廊。羨師閑未得。早起逐班行。

晚歸

著服道情出。煙街薄暮還。風清飄短袂。馬健弄連環。水靜聞歸櫓。霞明見遠山。過從本無事。從此涉旬閒。

問雁客故人

久作他鄉客。深慚薄宦非。不知雲上雁。何得每年歸。夜靜聲彌怨。天空影更微。往年離別淚。今夕重霑衣。

寒食日作

廚冷煙初禁。門閒日更斜。東風不好事。吹落滿庭花。過社紛紛燕。新晴淡淡霞。京都盛遊觀。誰訪子雲家。

歐陽太監雨中視決堤。明日見於省中。因戲之。

聞道張晨蓋徘徊石首東。濬川非伯禹。落水異三公。哀溼仍愁雨。冠欹更怯風。今朝復相見。疑是葛仙翁。

送吳郎中爲宣州推官知涇縣

征虜亭邊月。雞鳴伴客行。可憐何水部。今事謝宣城。風物聊供賞。班資莫繫情。同心不同載。留滯爲浮名。

寄舒州杜員外

信到得君書。知君已下車。粉闥情在否。蓬幕興何如。人望徵賢入。余思從子居。潛山真隱地。憑爲卜茅廬。

賦得擣衣

江上多離別。居人夜擣衣。拂砧知露滴。促杵恐霜飛。漏轉聲頻斷。愁多力自微。裁縫見夢見。腰帶定應非。

九月三十夜雨寄故人

獨聽空塔雨。方知秋事悲。寂寥旬假日。蕭颯夜長時。別念紛紛起。寒更故故遲。情人如不醉。定是兩相思。

寄撫州鍾郎中

時王師敗績於
閩中謫在建州

去載分襟後。尋聞在建安。封疆正多事。嶠俎若爲歡。都護空遺鏃。君明欲舞干。繞朝時不用。非是殺身難。

秋日盧龍村舍

置卻人閒事。閒從野老游。樹聲村店晚。草色古城秋。獨鳥飛天外。閒雲度隴頭。姓名君莫問。山木與虛舟。

中書相公谿亭閒宴依韻

李建勳

雨霽秋光晚。亭虛野興迴。沙鷗掠岸去。谿水上塔來。客傲風欲幘。筵香菊在盃。東山長許醉。何事憶天台。

寄饒州王郎中效李白體

珍重王光嗣。交情尙在不。蕪城連宅住。楚塞並車游。別後官三改。年來歲六周。銀鈎無一字。何以緩離愁。

臨石步港

倚岸隳縈帶。微風起細漣。綠陰三月後。倒影亂峯前。吹浪游鱗小。黏苔碎石圓。曾將腰下組。換取釣魚船。

和江州江中丞見寄

賈傅南遷久。江關道路遙。北來空見雁。西去不如潮。鼠穴依城社。鴻飛在泚寥。高低各有處。不擬更相招。

過江

別路知何極。離腸有所思。登艫望城遠。搖櫓過江遲。斷岸煙中失。長天水際垂。此心非橘柚。不爲兩鄉移。

秦州道中卻寄東京故人

風緊雨淒淒。川迴岸漸低。吳州林外近。隋苑霧中迷。聚散紛如此。悲歡豈易齊。料君殘酒醒。還聽子規啼。

陶使君挽歌二首

太守今何在。行春去不歸。筵空收管吹。郊迴儼驂騑。營外星纔落。園中露已晞。傷心梁上燕。猶解向人飛。

雪中作

賦分多情客。經年云國心。疎鐘寒郭晚。密雪水亭深。影迴鴻投渚。聲愁雀噪林。他鄉一罇酒。獨坐不成斟。
寄從兄憲兼示二弟

別路吳將楚。離憂弟與兄。斷雲驚晚吹。秋色滿孤城。信遠鴻初下。鄉遙月共明。一枝棲未穩。迴首望三京。
送荻栽與秀才朱觀

羨子清吟處。茅簷面碧流。解憎蓮豔俗。唯欠荻花幽。鷺立低枝晚。風驚折葉秋。贈君須種取。不必樹忘憂。
常州驛中喜雨

颯颯旱天雨。涼風一夕迴。遠尋南畝去。細入驛亭來。蓑唱牛初牧。漁歌棹正開。盆庭頓無事。歸思酌金壘。
驛中七夕

七夕雨初霽。行人正憶家。江天望河漢。水館折蓮花。獨坐涼何甚。微吟月易斜。今年不乞巧。鈍拙轉堪嗟。
贈浙西妓亞仙筵上作

翠黛頻如怨。朱顏醉更春。占將南國貌。惱殺別家人。粉汗沾巡蓋。花鈿逐舞茵。明朝綺窗下。離恨兩殷勤。
送劉山陽

舊族知名士。朱衣宰楚城。所嗟吾道薄。豈是主恩輕。戰鼓何時息。儒冠獨自行。此心多感激。相送若爲情。
送黃秀才姑孰辟命

世亂離情苦。家貧色養難。水雲孤棹去。風雨暮春寒。幕府才方急。騷人淚未乾。何時王道泰。萬里看鵬搏。

送王四十五歸東都

海內兵方起，離筵淚易垂。
憐君負米去，惜此落花時。
想憶看來信，相寬指後期。
殷勤手中柳，此是向南枝。

送勳道人之建安

下國兵方起，君家義獨聞。
若爲經世利，歸去臥溪雲。
桂席衝嵐翠，攜筇破蘚紋。
離情似霜葉，江上正紛紛。

和明上人除夜見寄

酌酒圍爐久，愁襟默自增。
長年逢歲暮，多病見兵興。
夜色開庭燎，寒威入硯冰。
湯師無別念，吟坐一燈凝。

正初和鄂州邊郎中見寄

潦倒含香客，淒涼賦鵬人。
未能全卷舌，終擬學垂綸。
故友暌離久，音書問訊頻。
相思俱老大，又見一年新。

送劉司直出宰

之子有雄文，風標秀不羣。
低飛從墨綬，逸志在青雲。
柳色臨流動，春光到縣分。
賢人多靜理，未爽醉醺醺。

送朱先輩尉廬陵

我重朱夫子，依然見古人。
成名無愧色，得祿及慈親。
莫歎官資屈，寧論活計貧。
平生心氣在，終任靜邊塵。

送龔明府九江歸寧

茂宰隳官去，扁舟著綵衣。
湓城春酒熟，康阜野花稀。
解纜垂楊綠，開帆宿鷺飛。
一朝吾道泰，還逐落潮歸。

步虛詞五首

氣於還元正。心由抱一靈。凝神歸罔象。飛步入青冥。整服乘三素。旋綱臨九星。瓊章開後學。稽首奉真經。
天帝黃金闕。真人紫錦書。霓裳紛蔽景。羽服迴凌虛。白鶴能爲使。班麟解駕車。靈符終願借。轉共世情疎。
聖主過幽谷。虛皇在紫宮。五千宗物母。七字祕神童。世上金壺遠。人間玉籥空。唯餘養身法。修此與天通。
何處求元解。人間有洞天。勤行皆是道。謫下尙爲仙。蔽景乘朱鳳。排虛駕紫煙。不嫌園吏傲。願在玉宸前。
三素霏霏遠。盟威凜凜寒。火鈴空滅沒。星斗曉闌干。佩響流虛殿。爐烟在醺壇。蕭寥不可極。驂駕上雲端。
宿茅山寄舍弟

茅許稟靈氣。一家同上賓。仙山空有廟。舉世更無人。獨往誠違俗。浮名亦累真。當年各自勉。雲洞鎮長春。
晚憩白鶴廟寄句容張少府

日入林初靜。山空暑更寒。泉鳴細巖竇。鶴唳眇雲端。拂榻安棋局。焚香戴道冠。望君殊不見。終夕凭欄干。
和致仕張尚書新創道院

梓澤成新致。金丹有舊情。挂冠朝睡足。隱几暮江清。藥圃分輕綠。松窗起細聲。養高寧厭病。默坐對諸生。
尚書時有瘡疾。

京使迴自臨川得從兄書寄詩依韻和

珍重還京使。殷勤話故人。別離長挂夢。寵祿不關身。趣向今成道。聲華舊絕塵。莫嗟容髮老。詩句逐時新。

文獻太子挽歌詞五首

國有承祧重人今秉哲尊清風來望苑遺烈在東藩此日升緱嶺何因到寢門天高不可問煙竊共昏昏
夏啓吾君子周儲上帝賓音容一飄忽功業自紛綸露泣承華月風驚麗正塵空餘商嶺客行哭下宜春
出處成交讓經綸有大功淚碑瓜步北棠樹蒜山東百揆方時敍重離遂不融故臣偏感咽曾是歎三窮
甲觀光音促園陵天地長簫笳咽無韻賓御哭相將盛烈傳彝鼎遺文被樂章君臣知己分零淚亂無行
綵仗清晨出非同齒冑時愁煙鎖平甸朔吹繞寒枝楚客來何補緱山去莫追迴瞻飛蓋處揜袂不勝悲
送王員宰德安

家世朱門貴官資粉署優今爲百里長應好五峯游柳影連彭澤湖光接庾樓承明須再入官滿莫淹留
以端谿硯酬張員外水精珠兼和來篇

請以端谿潤醺君水玉明方圓雖異器功用信俱呈自得山川秀能分日月精巾箱各珍重所貴在交情
光穆皇后挽歌三首

仙馭期難改坤儀道自光闕宮新表德沙麓舊膺祥素帶堯門揜凝笳畢陌長東風慘陵樹無復見親桑
永樂留虛位長陵啓夕扉返虞嚴吉仗復土揜空衣功業投三母光靈極四妃唯應彤史在不與露花暝
隱隱闔門路煙雲曉更愁空瞻金輅出非是濯龍游德感人倫正風行內職修還隨偶物化同此思軒邱
侍宴賦得歸雁

夜靜牽動息。翩翩一雁歸。清音天際遠。寒影月中微。何處雲同宿。長空雪共飛。陽和常借便。免與素心違。

又賦早春書事

苑裏芳華早。皇家勝事多。弓聲達春氣。奕思養天和。煖酒紅爐火。浮舟綠水波。雪晴農事起。繁壤聽農歌。

春雪應制

繁陰連曙景。瑞雪洒芳辰。勢密猶疑臘。風和始覺春。縈林開玉蕊。飄座裛香塵。欲識宸心悅。雲謠慰兆人。

賦得秋江晚照

落日照平流。晴空萬里秋。輕明動楓葉。點的亂沙鷗。罨網魚梁靜。簞簦稻穗收。不教行樂倦。冉冉下城樓。

和遊光睦院

寺門山水際。清淺照屏顏。客櫂晚維岸。僧房猶掩關。日華穿竹靜。雲影過塔閒。箕踞一長嘯。忘懷物我間。

和張少監舟中望蔣山

谿路向還背。前山高復重。紛披紅葉樹。間斷白雲峯。盡日慵移櫂。何年醉倚松。自知問未得。不敢笑周顒。

奉御札賦茱萸詩

御札新酒初熟。偶與鄭王諸公。開筵於清宴堂。廡之間。既覽秋初。復囑霜晨。因賦茱萸一。以遺此時之興。聊竭寸敏。思不可獨醒。宜應急徵。同賦前旨。翰林學士臣徐鉉進詩云。

萬物慶西成。茱萸獨擅名。房排紅結小。香透夾衣輕。宿露霑猶重。朝陽照更明。長和菊花酒。高宴奉西清。

秋日泛舟賦蘋花

素豔擁行舟。清香覆碧流。遠煙分的的。輕浪汎悠悠。雨歇平湖滿。風涼運漚秋。今朝流詠處。卽是白蘋洲。

明道人歸西林求題院額作此送之

昔從岐陽狩。簪纓滿翠微。十年勞我夢。今日送師歸。曳尾龜應樂。乘軒鶴謾肥。含情題小篆。將去挂岩扉。

送宣州邱判官

憲署游從阻。平臺道路賒。喜君馳後乘。於此會仙槎。緩酌遲飛蓋。微吟望綺霞。相迎在春渚。暫別莫咨嗟。

禁中新月

今夕拜新月。沉沉禁署中。玉繩疎間彩。金掌靜無風。節換知身老。時平見歲功。吟看北墀暝。蘭燼墜微紅。

棋賭賦詩輸劉起居 集

刻燭知無取。爭先素未精。本圖忘物我。何必計輸贏。賭墅終規利。焚囊亦近名。不如相視笑。高詠兩三聲。

後湖訪古各賦一題得西邸

南朝藩閫地。八友舊招尋。事往山光在。春晴草色深。曲池魚自樂。叢桂鳥頻吟。今日中興運。猶懷翰墨林。

賦得霍將軍辭第

漢將承恩久。陶勳肯顧私。匈奴猶未滅。安用以家爲。郢匠雖聞詔。衡門竟不移。寧煩張老頌。無待晏嬰辭。

甲乙人徒費。親鄰我自持。悠悠千載下。長作帥臣師。

題畫石山

彼美巉巖石。誰施黼藻功。回巖明照地。絕壁爛臨空。錦段鮮須濯。羅屏展易窮。不因秋蘚綠。非假晚霞紅。羽客藏書洞。樵人取箭風。靈蹤理難問。仙客去何通。返駕歸塵裏。留情向此中。迴瞻畫圖畔。遙羨面山翁。

賦得風光草際浮

宿露依芳草。春郊古陌旁。風輕不盡偃。日早未晞陽。耿耿依平遠。離離入望長。映空無定彩。飄逕有餘光。颺若荷珠亂。紛如燭火颺。詩人多感物。凝思繞池塘。

題碧巖亭贈孫尊師

絕境何人識。高亭萬象含。凭軒臨樹杪。送目極天南。積靄生泉洞。歸雲鎖石龕。丹霞披翠巘。白馬帶晴嵐。仙去留虛至。龍歸漲碧潭。幽巖君獨愛。元味我曾耽。世上愁何限。人間事久諳。終須脫羈鞅。來此會空談。

送高舍人使嶺南

西掖官曹近。南溟道路遙。使星將渡漢。仙棹乍乘潮。柳映靈和折。梅依大庾飄。江帆風淅淅。山館雨蕭蕭。陸賈真迂闊。終童久寂寥。送君何限意。把酒一長謠。

和歙州陳使君見寄

新安風景好。時令肅轅門。身貴心彌下。功多口不言。韜鈴家法在。儒雅素風存。簪履陪游盛。鄉閭族化敦。臨谿山色秀。繞郭水聲喧。織絡文章麗。矜嚴道義尊。樓臺秋月靜。京庾晚雲屯。曉吹傳衙鼓。晴陽展信幡。一篇貽友好。千里倍心論。未見歸驂勳。空能役夢魂。

依韻和令公大王薔薇詩

綠樹成陰後。羣芳稍歇時。誰將新濯錦。挂向最高枝。卷箔香先入。凭欄影任移。賞頻嫌酒渴。吟苦怕霜髭。架迴籠雲幄。庭虛展繡帷。有情縈舞袖。無力冒游絲。嫩蕊鸞偷采。柔條柳伴垂。荀池波自照。梁苑客嘗窺。玉李尋皆謝。金桃亦暗衰。花中應獨貴。庭下故開遲。委豔粧苔砌。分華借槿籬。低昂勻灼爍。濃淡疊參差。幸值王宮裏。仍逢宰府知。芳心向誰許。醉態不能支。芍藥天教避。玫瑰衆共嗤。光明烘畫景。潤膩裛輕霏。麗似期神女。珍如重衛姬。君王偏屬詠。士子盡搜奇。

和門下殷侍郎新茶二十韻

暖吹入春園。新芽競粲然。才教鷹觜拆。未放雪花妍。荷杖青林下。攜筇旭景前。孕靈資雨露。種秀自山川。碾後香彌遠。烹來色更鮮。名隨土地貴。味逐水泉遷。力籍流黃暖。形模紫筍圓。正當鑽柳火。遙想湧金泉。任道時新物。須依古法煎。輕甌浮綠乳。孤竈散餘煙。甘薺非予匹。宮槐讓我先。竹孤空冉冉。荷葉謾田田。解渴消殘酒。清神感夜眠。十漿何足饋。百榼盡堪捐。采掇唯憂晚。營求不計錢。任公因焙顯。陸氏有經傳。愛甚真成癖。嘗多合得仙。亭臺虛靜處。風月豔陽天。自可臨泉石。何妨雜管弦。東山似蒙頂。願得從諸賢。

奉和右省僕射西亭高臥作

院靜蒼苔積。庭幽怪石欹。蟬聲當檻急。虹影向簷垂。晝漏猶憐永。叢蘭未覺衰。疎簾巢翡翠。折葦覆鸕鷀。對酒襟懷曠。圍棋旨趣遲。景皆隨所尚。物各遂其宜。道與時相會。才非世所羈。賦詩貽座客。秋事爾何悲。

納后夕侍宴

天上軒星正。雲間湛露垂。禮容過渭水。宴喜勝瑤池。彩霧籠花燭。升龍肅羽儀。君臣歡樂日。文物盛明時。簾捲銀河轉。香凝玉漏遲。華封傾祝意。觴酒與聲詩。

哭荆部侍郎喬公詩

公臨終數日。舍弟往候之。怡然言曰。吾往矣。君兄弟可各爲一詩哭我。翼日。復告門生曰。吾已得徐君兄弟許我詩。餘無事矣。其志忘死生也如此。嗚呼。絮酒之禮。已隔平生。挂劍之信。永昇穹壤。故以

二章爲誌。闕于

九原。其詩云。

舉世重文雅。夫君更質真。曾嗟混雞鶴。終日異淄磷。詞賦離騷客。封章諫諍臣。襟懷道家侶。標格古時人。逸老誠云福。遺形未免貧。求文空得草。埋玉遂爲塵。靜想忘年契。冥思接武晨。連宵洽杯酒。分日掌絲綸。蠹簡書陳事。遺孤託世親。前賢同此歎。非我獨霑巾。

全五代詩卷二十七

南唐

徐鉉二

和元帥書記蕭郎中觀習水師

元帥樓船出治兵，落星山外火旗明。
千帆日助江陵勢，萬里風馳下瀨聲。
殺氣曉嚴波上鷁，凱歌遙駭海邊鯨。
仲宣一作從軍詠，迴顧儒衣自不平。

宣威苗將軍貶官後重經故宅

蔣山南望近西坊，亭館依然鎖院牆。
天子未嘗過細柳，將軍尋已戍燉煌。
史萬歲嘗謫戍燉煌鼓傾怪石山無色，零落

圓荷水不香。爲將爲儒皆寂寞，門前愁殺馬中郎。

病題

人間多事本難論，況是人間嬾慢人。
不解養生何怪病，已知命敢辭貧。
向空咄咄煩書字，舉世滔滔莫問津。
金馬門前君識否，東方曼倩是前身。

送蒯司錄歸京兆

早年聞有蒯先生，二十餘年道不行。抵掌曾論天下事，折腰猶悟俗人情。老還上國歡娛少，貧裏歸裝結束輕。遷客臨流倍惆悵，冷風黃葉滿山城。

送郝郎中爲浙西判官

大藩從事本優賢，幕府仍當北固前。花繞樓臺山倚郭，寺臨江海水連天。恐君到卽忘歸日，憶我遊曾歷二年。若許他時作閑伴，殷勤爲買釣魚船。

和鍾太監汎舟同游見示

潮溝橫趣北山阿，一月三游未是多。老去交親難暫捨，閑中滋味更無過。溪橋樹映行人渡，村徑風飄牧豎歌。孤櫂亂流偏有興，滿川晴日弄微波。

進雪詩

欲使新正識有年，故飄輕絮伴春還。近看瓊樹籠銀闕，遠想瑤池帶玉關。潤逐麝麝鋪綠野，暖隨杯酒上朱顏。朝來花萼樓中宴，數曲唐歌雅頌間。

登甘露寺北望

京口潮來曲岸平，海門風起浪花生。人行沙上見日影，舟過江中聞櫓聲。芳草遠迷楊子渡，宿煙深映廣陵城。游人鄉思應如橘，相望須含兩地情。

京口江際弄水

退公求靜獨臨川。楊子江南二月天。百尺翠屏甘露閣。數帆晴日海門船。波澄瀨石寒如玉。草接汀蘋綠似煙。安得乘槎更東去。十洲風外弄潺湲。

陳覺放還至泰州以詩見寄作此答之

朱雲曾爲漢家憂。不怕交親作世仇。壯氣未平空咄咄。狂言無驗信悠悠。今朝我作傷弓鳥。卻羨君爲不繫舟。勞寄新詩平宿憾。此生心氣貫清秋。

王三十七自京垂訪作此送之

失鄉遷客在天涯。門掩苔垣向水斜。只就鱗鴻求遠信。敢言車馬訪貧家。煙生柳岸將垂縷。雪壓梅園半是花。惆悵明朝尊酒散。夢魂相送到京華。

聞查建州陷賊寄鍾郎中

聞道將軍輕壯闊。螺江城下委犀渠。旌旗零落沈荒服。簪履蕭條返故居。皓首應全蘇武節。故人誰得李陵書。自憐放逐無長策。空使盧譔淚滿裾。

寄外甥苗武仲

放逐今來漲海邊。親情多在鳳臺前。且將聚散爲閑事。須信華枯是偶然。蟬噪疎林村倚郭。鳥飛殘照水連天。此中唯欠韓康伯。共對秋風詠數篇。

送楊郎中唐員外奉使湖南

江邊微雨柳條新。握節含香二使臣。兩綬對懸雲夢日。方舟齊汎洞庭春。今朝草木逢新律。昨日山川滿戰塵。同是多情懷古客。不妨爲賦弔靈均。

送許郎中歙州判官兼黟縣

舊寧涇縣許宣平亦黟人也

嘗聞黟縣似桃源。況是優游冠玳筵。遺愛非遙應臥理。祖風猶在好尋仙。朝衣舊識熏香史。祿米初營種秫田。大抵宦遊須自適。莫辭離別二三年。

邵伯埭下寄高郵陳郎中

故人相別動經年。侯館相逢倍慘然。顧我飲冰難輟櫂。感君扶病爲開筵。河灣水淺翹秋鷺。柳岸風微噪暮蟬。欲識酒醒魂斷處。謝公祠畔客亭前。

謫居舒州累得韓高二舍人書作此寄之

三峰煙靄碧臨溪。中有騷人理鉤絲。會友少於分袂日。謫居多卻在朝時。丹心歷歷吾終信。俗慮悠悠爾不知。珍重韓君與高子。殷勤書札寄相思。

移饒州別周使君

正憐東道感賢侯。何幸南冠脫楚囚。睨伯臺前收別宴。喬公亭下艤行舟。四年去國身將老。百郡徵兵主尙憂。更向鄱陽湖上去。青衫憔悴淚交流。

避難東歸依韻和黃秀才見寄

感感逢人問所之。東流相送向京畿。自甘逐客級蘭佩。不料貧民著戰衣。樹帶荒村春冷落。江澄霽色霧霏微。時危道喪無才術。空手徘徊不忍歸。

送黃梅江明府

封疆多難正經綸。臺閣如何不用君。江上又勞爲小邑。篋中徒自有雄文。書生膽氣人誰信。遠俗歌謠主不聞。一首新詩無限意。再三吟味向秋雲。

和蕭郎中平日見寄

細雨輕風采藥時。褰簾隱几更何爲。豈知澤畔紉蘭客。來赴城中角黍期。多罪靜思如劉蕡。敕書纔聽似含飴。謝公制勝常閑暇。願接西州敵手棋。

和太常蕭少卿近郊馬上偶吟

田園經雨綠分畦。飛蓋閑行九里隄。拂袖清風塵不起。滿川芳草路如迷。林開始覺晴天迴。潮上初驚浦岸齊。怪得仙郎詩句好。斷霞殘照遠山西。

又和

抱甕何人灌藥畦。金銜爲爾駐平堤。村橋野店景無限。綠水晴天思欲迷。橫苗乍隨輕吹斷。歸帆疑與遠山齊。鳳城迴望真堪畫。萬戶千門蔣橋西。

和蕭少卿見慶新居

湘浦懷沙已不疑。京城賜第豈前期。鼓聲到曉知坊遠。山色來多與靜宜。簪屨尙應憐故物。稻粱空自媿華池。新詩問我偏饒思。還念鷓鴣得一枝。

送從兄赴臨川幕

梁王籍寵就東藩。還召鄒枚坐兔園。今日好論天下事。昔年同受主人恩。石頭城下春潮滿。金柅亭邊綠樹繁。唯有音書慰離別。一盃相送別無言。

和江西蕭少卿見寄

亡羊歧路媿司南。二紀窮通聚散三。老去何妨從笑傲。病來看欲嬾朝參。離腸似線常憂斷。世態如湯不可探。珍重加餐省思慮。時時斟酒壓山嵐。

和尉遲贊善秋暮僻居

登高節物最堪憐。小嶺疎林對檻前。輕吹斷時雲縹緲。夕陽明處水澄鮮。江城秋早催寒事。望苑朝稀足晏眠。庭有菊花尊有酒。若方陶令媿前賢。

陪鄭王相公賦筵前垂冰應教依韻

窗外虛明雪乍晴。簷前垂霑盡成冰。長廊瓦疊行行密。晚院風高寸寸增。玉指乍拈簪向媿。金階時墜磬難勝。晨餐堪醒曹參酒。自恨空腸病不能。

池州陳使君見示游齊山詩因寄

往歲曾游弄水亭。齊峯濃翠暮軒橫。哀猿出檻心雖喜。傷鳥聞弦勢易驚。病後簪纓殊寡興。老來泉石倍關情。本朝池口風波靜。遙賀山前有頌聲。

再領制誥和王明府見賀

蹇步還依列宿邊。拱辰重認舊雲天。自嗟多難飄零困。不似當年膽氣全。雞樹晚花疎向日。龍池輕浪細含烟。從來不解爲身計。一葉悠悠任大川。

和方泰州見寄

逐客悽悽重入京。舊愁新恨兩難勝。雲收楚塞千山雪。風結秦淮一尺冰。置醴筵空情豈盡。投湘文就思如凝。更殘月落知孤坐。遙望船窗一點星。

嚴相公宅牡丹

但是豪家重牡丹。爭如丞相開前看。鳳樓日暖開偏早。雞樹陰濃謝更難。數朵已應迷國豔。一枝何幸上塵冠。不知更許憑欄否。爛熳春光未肯殘。

九日落星山登高

秋暮天高稻穗成。落星山上會諸賓。黃花汎酒依流俗。白髮盈頭思古人。崖影晚看雲出岫。湖光遙見客垂綸。風烟不改年長度。終待林泉老此身。

御筵送鄧王

禁裏秋光似水清。林煙池上共離情。暫移黃閣只三載。卻望紫垣都數程。滿座清風天子送。隨車甘雨郡人迎。綺霞閣上題詩在。從此還應有頌聲。

陳侍郎宅觀花燭

今夜銀河萬里秋。人言織女嫁牽牛。佩聲寥亮和金奏。燭影熒煌映玉鉤。座客亦從天子賜。更籌須爲主人留。世間盛事君知否。朝下鸞臺夕鳳樓。

蒙恩賜酒旨令醉進詩以謝

明光殿裏夜迢迢。多病逢秋自寂寥。蠟炬乍傳丹鳳詔。御題初認白雲謠。今宵幸識衢尊味。明日知停入閣朝。爲感君恩判一醉。不煩辛苦解金貂。

題梁王舊園

梁王舊館枕潮溝。共引垂藤繫小舟。樹倚荒臺風淅淅。草埋欹石雨修修。門前不見鄒枚醉。池上時聞雁鴈愁。節士逢秋多感激。不須頻向此中游。

觀吉王從謙花燭

王門嘉禮萬人觀。況是新承置醴歡。花燭喧闐丞相府。星辰搖動遠遊冠。歌聲暫闕聞宮漏。雲影初開見露盤。帝里佳期頻賦頌。長留故事在金鑾。

憶新淦鴈池寄孟賓于員外

往年淦水駐行軒，引得清流似月圓。自有溪光還碧甃，不勞人力遞金船。潤滋苔蘚欺茵席，聲入杉松當管弦。珍重詩人頻管領，莫教塵土咽潺湲。

使浙西先寄獻燕王侍中

京江風靜喜乘流，極目遙瞻萬歲樓。喜氣龍恩甘露晚，水煙波淡海門秋。五年不見鸞臺長，明日將陪兔苑遊。欲問平臺門下吏，相君還許吐茵不。

和張先輩見寄二首

去國離羣擲歲華，病容憔悴媿丹砂。谿連舍下衣長潤，山帶城邊日易斜。幾處垂鉤依野岸，有時披褐到鄰家。故人書札頻相慰，誰道西京道路賒。清時淪放在山州，叩竹紗巾處處游。野日蒼茫悲鵬舍，水風陰溼弊貂裘。雞鳴候旦寧辭晦，松節凌霜幾換秋。兩首新詩千里道，感君情分獨知邱。

夢游

繡幌銀屏杏靄間，若非魂夢到應難。窗前人靜偏宜夜，戶內春濃不識寒。蘸甲還觴纖似玉，含詞忍笑膩於檀。錦書若要知名字，滿縣花開不姓潘。

南國佳人字玉兒，芙蓉雙臉遠山眉。仙郎有約長相憶，阿母無猜不得知。夢裏行雲還倏忽，暗中攜手乍

疑遲。因思別後。閑窗下。織得迴文幾首詩。

和蕭少卿見慶新居

驚蓬偶駐知多幸。斷雁重聯愜素期。當戶小山如舊職。上牆幽薜最相宜。清風不去因栽竹。隙地無多也鑿池。更喜良鄰有嘉樹。綠陰分得近南枝。

送陳祕監歸泉州

風滿潮溝木葉飛。水邊行客駐騶騑。三朝恩澤馮唐老。萬里鄉關賀監歸。世路窮通前事遠。半生談笑此心違。離歌不識高堂慶。特地令人淚滿衣。

將去廣陵別史員外南齋

家聲曾與金張輩。官署今居何宋間。起得高齋臨靜曲。種成奇樹學他山。鴛鴦終日同醒醉。蘿薜常時共往還。賤子今朝獨南去。不堪回首望清閒。

從駕東幸呈諸公

吳公臺下舊京城。曾揜衡門過十春。別後不知新景象。信來空問故交親。宦游京口無高興。習隱鍾山限俗塵。今日喜爲華表鶴。況陪鷁鷺免迷津。

送魏舍人仲甫爲蘄州判官

從事蘄春興自長。蘄人應識紫微郎。山資足後拋名路。蕝菜秋來憶故鄉。以道卷舒猶自適。臨戎談笑固

無妨。如聞郡閣吹橫笛。時望青谿憶野王。

題殷舍人宅木芙蓉

憐君庭下木芙蓉。嫋嫋纖枝淡淡紅。曉吐芳心零宿露。晚搖嬌影媚清風。似含情態愁秋雨。暗減馨香借菊叢。默飲數杯應未稱。不知歌管與誰同。

賦得有所思

所思何在杳難尋。路遠山長水復深。衰草滿庭空佇立。清風吹袂更長吟。忌情好酌青田酒。寄恨宜調綠綺琴。落日鮮雲偏聚散。可能知我獨傷心。

贈王貞素先生

先生嘗已佩真形。紺髮朱顏骨氣清。道祕未傳鴻寶術。院深時聽步虛聲。遼東幾度悲城郭。吳市終應變姓名。三十六天皆有籍。他年何處問歸程。

游蔣山題辛夷花寄陳奉禮

本約陳同游不至

今歲游山已恨遲。山中仍喜見辛夷。簪纓且免全爲累。桃李猶堪別作期。晴後日高偏照灼。晚來風急漸離披。山郎不作同行伴。折得何由寄所思。

從兄龍武將軍沒於邊戍過舊營宅作

前年都尉沒邊城。帳下何人領舊兵。徼外瘴烟沉鼓角。山前秋日照銘旌。笙歌卻返烏衣巷。部曲皆還細柳營。今日園林過寒食。馬蹄猶擬入門行。

和王庶子寄題兄長建州廉使新亭

謝守高齋結構新。一方風景萬家情。羣賢詎減山陰會。遠俗初聞正始聲。水檻片雲長不去。訟庭纖草轉應生。阿連詩句偏多思。遙想池塘晝夢成。

秋日雨中與蕭贊善訪殷舍人於翰林座中作

野出西垣步步遲。秋光和水雨如絲。銅龍樓下逢閒客。紅藥塔前訪舊知。亂點乍滋承露處。碎聲因想滴篷時。銀臺鑰入須歸去。不惜餘歡盡酒卮。

送和州張員外爲江都令

經年相望隔重湖。一旦相逢在上都。塞詔官班聊慰否。埋輪意氣尙存無。由來聖代憐才子。始覺清風激懦夫。若向西岡尋勝賞。舊題名處爲躊躇。

除夜

寒燈耿耿漏遲遲。送故迎新了不欺。往事併隨殘歷日。春風寧識舊容儀。預慙歲酒難先飲。更對鄉儺羨小兒。吟罷明朝贈知己。便須題作去年詩。

寄鍾謨

看看潘鬢二毛生。昨日林梢又鵲驚。欲對春風忘世慮。敢言罇酒召時英。假中西閣應無事。筵上南威幸有情。不得車公終不樂。已教紅袖出門迎。

江舍人宅筵上有妓唱和州韓舍人歌辭因以寄

良宵絲竹偶成歡。中有佳人俯翠鬟。白雲飄飄傳樂府。阮郎憔悴在人間。清風明月長相憶。佩蕙紉蘭早晚還。深夜酒空筵欲散。向隅惆悵鬢堪斑。

賀殷游二舍人入翰林江給事拜中丞

清晨待漏獨徘徊。霄漢懸心不易裁。聞老深嚴歸翰苑。夕郎威望拜霜臺。青綾對覆蓬壺晚。赤棒前驅道路開。猶有西垣廳記在。莫忘同草紫泥來。

送歐陽大監游廬山

家家門外廬山路。唯有夫君乞假遊。案牘乍拋公署晚。林泉已近暑天秋。海潮盡處逢陶石。江月圓時上庾樓。此去蕭然好長往。人間何事不悠悠。

和蕭郎中小雪日作

征西府裏日西斜。獨試新爐自煮茶。籬菊盡來低覆水。寒鴻飛去遠連霞。寂寥小雪閒中過。斑駁輕霜鬢上加。算得流年無奈處。莫將詩句祝蒼華。

寄歙州呂判官

任公郡占好山川。谿水縈迴路屈盤。南國自來推勝境。故人此地作郎官。風光適意須留戀。祿秩資貧且喜歡。莫憶班行重迴首。是非多處是長安。

附池州薛郎中書因寄歙州張員外

新安從事舊臺郎。直氣多才不可忘。一旦江山馳別夢。幾年簪紱共周行。政分出處何方是。情共窮通此義長。因附鄰州寄消息。接輿今日信爲狂。

寄江都路員外

吾兄失意在東都。聞說襟懷任所如。已縱乖慵爲傲吏。有何關鍵制豪胥。縣齋曉閉多移病。南畝秋荒憶遂初。知道故人相憶否。嵇康不得懶修書。

送應之道人歸江西

曾騎竹馬傍洪崖。二十餘年變物華。客夢等閒過驛閣。歸帆遙羨指龍沙。名題小篆矜垂露。詩作吳吟對綺霞。歲暮定知迴未得。信來憑爲寄梅花。

送元帥書記高郎中出爲婺源建威軍使

寒風蕭瑟楚江南。記室戎裝挂錦帆。倚馬未曾妨笑傲。斬牲先要厲威嚴。危言昔日嘗無隱。壯節今來信不凡。唯有盃盤思上國。酒膠甜淡菜蔬甘。

寄江州蕭給事

夕郎憂國不憂身。今向天涯作逐臣。魂夢暗馳龍闕曙。嘯吟閒繞虎谿春。朝車載酒過山寺。諫紙題詩寄野人。惆悵慙夫何足道。白離羣後已同塵。

貶官秦州出城作

浮名浮利信悠悠。四海干戈痛主憂。三諫不從爲逐客。一身無累似虛舟。滿朝權貴皆曾忤。繞郭林泉已徧游。唯有戀恩終不改。半程猶是望城樓。

得浙西郝判官書未及報聞燕王移鎮京口因寄此詩問方判官田書記消息

秋風海上久離居。曾得劉公一紙書。淡水心情長若此。銀鈎蹤迹更無如。嘗憂座側飛鸛鳥。未暇江中覓鯉魚。今日京吳建朱邸。問君誰共曳長裾。

九日雨中

茱萸房重雨霏微。去國逢秋此恨稀。目極暫登臺上望。心遙長向夢中歸。荃蘼路遠愁霜早。兄弟鄉遙羨雁飛。唯有多情一枝菊。滿盃顏色自依依。

還過東都留守周公筵上贈座客

賈生三載在長沙。故友相思道路賒。已分終年甘寂寞。豈知今日返京華。麟符上相恩偏厚。隋苑留歡日欲斜。明旦江頭倍惆悵。遠山芳草映殘霞。

寄蕭給事

蕭江四
致仕

危言危行古時人。歸向西山臥白雲。買宅尙尋徐處士。殮霞終訪許眞君。容顏別後應如故。詩詠年來更不聞。今日城中春又至。落梅愁緒共紛紛。

贈泰州掾令狐克己

文公
曾孫

念子才多命且奇。亂中拋擲少年時。深藏七澤衣如雪。卻見中朝鬢似絲。舊德在人終遠大。扁舟爲吏莫推辭。孤芳自愛凌霜處。詠取文公白菊詩。

贈浙西顧推官

盛府賓寮八十餘。閉門高臥與無如。梁王苑裏相逢早。潤浦城中得信疏。狼籍杯盤重會面。風流才調一如初。願君百歲猶強健。他日相尋隱士廬。

迴至瓜洲獻侍中

紫微垣裏舊賓從。來向吳門謁府公。奉使謬持嚴助節。登門初識魯士公。笙歌隱隱違離後。煙水茫茫悵望中。日暮瓜洲江北岸。兩行清淚滴西風。

送彭秀才

賈生去國已三年。短褐閒行皖水邊。盡日野雲生舍下。有時京信到門前。無人與和投湘賦。媿子來浮訪

戴船滿袖新詩好。迴去莫隨騷客醉林泉。

和集賢鍾郎中

石渠冊府神仙署。當用明朝第一人。腰下別懸新印綬。座中皆是故交親。龍池樹色供清景。浴殿香風接近鄰。從此翻飛應更遠。徧尋三十六天春。

夢游

魂夢悠揚不奈何。夜來還在故人家。香灤蠟燭時時暗。戶映屏風故故斜。檀的慢調銀字管。雲鬟低綴折枝花。天明又作人間別。洞口春深道路賒。

全五代詩卷二十八

南唐

徐鉉三

送彭秀才南游

問君孤棹去何之。玉笛春風楚水西。山上斷雲分翠靄。林間晴雪入澄溪。琴心酒趣神相會。道士山童手共攜。他日時清更隨計。莫如劉阮洞中迷。

送龔員外赴江州幕

煩君更上築金臺。世難民勞藉俊才。自有聲名馳羽檄。不妨談笑奉罇罍。元規樓迴清風滿。匡俗山春畫障開。莫忘故人離別恨。海潮迴處寄書來。

送陳先生之洪井寄蕭少卿

聞君仙袂指洪涯。我憶情人別路賒。知有歡娛游楚澤。更無書札到京華。雲開驛閣連江靜。春滿西山倚漢斜。此處相逢應見問。爲言搔首望龍沙。

和江西蕭少卿見寄

身遙上國三千里。名在中朝二十春。金印不須辭入幕。麻衣曾此歎迷津。卷舒由我真齊物。憂喜忘心卽

養神世路風波自翻覆。虛舟無計得沈淪。

題紫陽觀

南朝名士富仙才。追步東卿遂不迴。丹井自深桐暗老。祠宮長在鶴頻來。巖邊桂樹攀仍倚。洞口桃花落復開。惆悵霓裳太平事。一函真跡鏤昭臺。

贈奚道士含象

先生曾有洞天期。猶傍天壇摘紫芝。處世自能心混沌。全真誰見德支離。玉霄塵閉人長在。金鼎功成俗未知。他日鸞輪謁茅許。願同雞犬去相隨。

題白鶴廟

平生心事向元關。一入仙鄉似舊山。白鶴唳空晴眇眇。丹沙流澗暮潺潺。嘗嗟多病嫌中藥。擬問真經乞小還。滿洞煙霞互陵亂。何峰臺榭是蕭閒。

和陳洗馬山莊新泉

已開山館待抽簪。更要巖泉欲洗心。常被松聲迷細韻。忽流花片落高岑。便疏淺瀨穿荒徑。始有清光映竹林。何日煎茶醞香酒。沙邊同聽暝猿吟。

奉和七夕應令

今宵星漢共晶光。應笑羅敷嫁侍郎。斗柄易傾離恨促。河流不盡從期長。靜聞天籟疑鳴佩。醉折荷花想

豔粧誰見宣猷堂上宴。一篇清韻振金鐙。

又和八日

微雲疎雨淡新秋。曉夢依稀十二樓。故作別離應有以。擬延更漏共無由。那教人世長多恨。未必天仙不解愁。博望苑中殘酒醒。香風佳氣獨遲留。

和印先輩及第後獻座主朱舍人郊居之作

成名郊外揜柴扉。樹影蟬聲共息機。積雨暗封青蘚徑。好風輕透白練衣。嘉魚始賦人爭誦。荆玉頻收國自肥。獨坐公廳正煩暑。喜吟新詠見元微。

印以南有嘉魚賦及第。

和陳贊善致仕還京口

海門山下一漁舟。中有高人未白頭。已駕安車歸故里。尙通閭籍在龍樓。泉聲漱玉窗前落。江色和煙檻外流。今日君臣厚終始。不須辛苦畫雙牛。

送禮部潘尙書致仕還建安

名遂功成累復輕。鱸魚因起舊鄉情。履聲初下金華省。帆影看離石首城。化劍津頭尋故老。同亭會上問仙卿。冥鴻高舉真難事。相送何須淚滿纓。

慢亭亦號同亭。

和尉遲贊善病中見寄

仙郎移病暑天過。卻似冥鴻避尉羅。晝夢乍驚風動竹。夜吟時覺露霑莎。情親稍喜貧居近。性嬾猶嫌上直多。望苑恩深期勿藥。青雲歧路未蹉跎。

山路花

不共垂楊映綺寮。依山臨路自嬌娆。游人過去知香遠。谷鳥飛來見影搖。半隔煙嵐遙隱隱。可堪風雨暮蕭蕭。城中春色還如此。幾處笙歌按舞腰。

重遊木蘭亭

繚繞長隄帶碧潄。昔年游此尙青衿。蘭橈破浪城陰直。玉勒穿花苑樹深。宦路塵埃成久別。仙家風景有誰尋。那知年長多情後。重凭欄干一獨吟。

宿蔣帝廟明日遊山南諸寺

便返城闌尙未甘。更從山北到山南。花枝似雪春雖半。桂魄如眉日始三。松蓋遮門寒黯黯。柳絲妨路翠毵毵。登臨莫怪偏留戀。遊宦多年事事諳。

和殷舍人蕭員外春雪

萬里春陰乍履端。廣庭風起玉塵乾。梅花嶺上連天白。蕙草塔前特地寒。晴去便爲經歲別。興來何惜徹宵看。此時鴛侶皆閑暇。贈答詩成禁漏殘。

寄蘄州高郎中

賈傅棲遲楚澤東。蘭皋三度換秋風。紛紛世事來無盡。黯黯離魂去不通。直道未能勝社鼠。孤飛徒自歎冥鴻。知君多少思鄉恨。併在山城一笛中。

正初答鍾郎中見招

高齋遲景雪初晴。風拂喬枝待早鶯。南省郎官名籍籍。東鄰妓女字英英。流年倏忽成陳事。春物依稀存舊情。新歲相思自過訪。不須虛左遠相迎。

病題

性靈慵嬾百無能。唯被朝參遣夙興。聖主優容恩未答。丹經疎闊病相陵。脾傷對客偏愁酒。眼暗看書每媿燈。進與時乖不知退。可憐身計謾騰騰。

和鍾郎中送朱先輩還京垂寄

分司洗馬無人問。辭客殷勤輟棹歌。蒼蘚滿庭行徑小。高梧臨檻雨聲多。春愁盡付千杯酒。鄉思遙聞一曲歌。且共勝遊消永日。西岡風物盡如何。

陪王庶子游後湖涵虛閣

懸圃清虛乍過秋。看山尋水上茲樓。輕鷗的的飛難沒。紅葉紛紛晚更稠。風卷微雲分遠岫。浪搖晴日照中州。躋攀況有承華客。如在南皮奉聖遊。

贈維揚故人

東京少長認維桑。書劍誰教入帝鄉。一事無成空放逐。故人相見重淒涼。樓臺寂寞官河晚。人物稀疏驛路長。莫怪臨風惆悵久。十年春色憶維揚。

和明府見寄

時情世難消。吾道薄宦流。年厄此身莫。歎京華同寂寞。曾經兵革共漂淪。對山開戶唯求靜。貰酒留賓不道貧。善政空多尙淹屈。不知誰是解憂民。

奉使九華山中塗遇青陽薛郎中

故人相別動相思。此地相逢豈素期。九子峰前閒未得。五谿橋上坐多時。甘泉從幸余知忝。宣室徵還子未遲。且飲一杯消別恨。野花風起漸離披。

南都遇前嘉魚劉令言游閩嶺作此與之

我持使節經韶石。君作閒游過武夷。兩地山光成獨賞。隔年鄉思暗相知。洪厓壇上長岑寂。孺子亭前自別離。珍重分歧一杯酒。強加飡飯數吟詩。

廬陵別朱觀先輩

桂籍知名有幾人。翻飛相續上青雲。解憐才子寧唯我。遠作卑官尙見君。嶺外獨持嚴助節。宮中誰薦長卿文。新詩試爲重高詠。朝漢臺前不可聞。

文或少卿。文山郎中交好深。至二紀已餘。睽別數年。二子長逝。奉使嶺表。塗次南康。弔孫氏之孤。

於其家觀文或手書於僧室慷慨悲歎留題此詩

孫家虛座弔諸孤。張叟僧房見手書。二紀歡游今若此。滿衣零淚欲何如。腰間金印從如斗。鏡裏霜華已滿梳。珍重遠公應笑我。塵心唯此未能除。

送孟賓于員外還新淦

暫來城闕不從容。卻佩銀魚隱玉峰。雙澗水邊歌醉石。九仙臺下聽風松。題詩翠壁稱逋客。采藥春畦狎老農。野鶴乘軒雲出岫。不知何日正相逢。

右省僕射相公垂覽和詩復貽長句輒次來韻

西院春歸道思深。披衣閒聽暝猿吟。鋪陳政事留黃閣。偃息神機在素琴。玉柄暫時疎末座。瑤華頻復惠清音。開晴便作東山約。共賞煙霞放曠心。

十日和张少監

重陽高會古平臺。吟徧秋光始下來。黃菊後期香未減。新詩捧得眼還開。每因佳節知身老。卻憶前歡似夢迴。且喜清時屢行樂。是非名利盡悠哉。

和张少監晚菊

憶共庭蘭倚砌栽。柔條輕吹獨依隈。自知佳節終堪賞。爲惜流光未忍開。采擷也須盈掌握。馨香還解滿罍罍。今朝假猶無事。更好登臨汎一杯。

送馮侍郎

聞君竹馬戲毗陵。誰道觀風自六卿。今日聲明光舊物。共看旌旆擁書生。斬蛟橋下谿煙碧。射虎亭邊草路清。應念筵中倍離恨。老來偏重十年兄。

送蕭尚書致任歸廬陵

江海分飛二十春。重論前事不堪聞。主憂臣辱誰非我。曲突徙薪唯有君。金紫滿身皆外物。雪霜垂領更離羣。鶴歸華表望不盡。玉筍山頭多白雲。

奉和子龍大監與舍弟贈答之什

江梁東觀兩優賢。明主知臣豈偶然。鴛鴦分行皆接武。金蘭同好共忘年。懷恩未遂林泉約。竊位空慙組綬懸。多少深情知不盡。好音相慰強成篇。

奉和御製茱萸

臺畔西風御果新。芳香精彩麗蕭辰。柔條細葉粧治好。紫帶紅芳點綴勻。幾朵得陪天上宴。千株長作洞中春。今朝聖藻偏流詠。黃菊無由更敢鄰。

送德邁道人之豫章

禪靈橋畔落殘花。橋上離情對日斜。顧我乘軒慙組綬。羨師飛錫指煙霞。樓中西嶺眞君宅。門外南州處士家。莫道空談便無事。碧雲詩思更無涯。

奉和宮傳相公懷舊見寄四十韻

謝傳功成德望全。鸞臺初下正蕭然。搏風乍息三千里。感舊重懷四十年。西掖新官同買馬。南朝興運似開天。文辭職業分工拙。流輩資讓後先。每愧陋容勞刻畫。長慚頑石費彫鐫。晨趨綸掖吟春永。夕會精廬待月圓。立馬有時同草詔。聯鑣幾處共成篇。閒歌柳葉翻新曲。醉詠桃花促綺筵。少壯況逢時世好。經過寧慮歲華遷。雲龍得路須騰躍。社櫟非材合棄捐。再謁湘江猶是幸。兩還宣室竟何緣。已知瑕玷勞磨瑩。又得官司重接連。聽漏分宵趨建禮。從遊同召赴甘泉。雲開閭闔分臺殿。風過華林度管絃。行止不離宮仗影。衣裾嘗惹御爐煙。師資稷契論中禮。依止山公典小鈐。多謝天波垂赤管。敢教晨景過華塹。翔飛附驥方經遠。巨楫垂風遂濟川。玉燭調時鈞軸正。台階平處德星懸。巖廊禮絕威客肅。布素情深友愛偏。長擬營巢安大廈。忽驚操鉞領中權。吳門日麗龍銜節。京口沙晴鷁畫船。蓋代名高方赫赫。戀恩心切更乾乾。袁安辭氣忠仍懇。吳漢精誠直且專。卻許邱明師紀傳。更容疎廣奉周旋。朱門自得施行馬。厚祿何妨食萬錢。密疏尙應勞獻替。清談唯見論空元。東山妓樂供閒步。北牖風涼足晏眠。元武湖邊林隱見。五城橋下棹洄沿。曾移苑樹開紅藥。新鑿家池種白蓮。不遣前驕妨野逸。別尋逋客互招延。棋枰寂靜陳虛閣。詩筆沈吟劈彩牋。往事偶來春夢裏。閒愁因動落花前。青雲舊侶嗟誰在。白首親情倍見憐。盡日凝思殊悵望。一章追敘信精研。韶顏莫與年爭競。世慮須憑道節宣。幸喜書生爲將相。定由陰德致神仙。羊公剩有登臨興。尙子都無嫁娶牽。退象天山鎮浮競。起爲霖雨潤原田。從容自保君臣契。何必扁舟始是賢。

觀人讀春秋

日覺儒風薄。誰將霸道差。亂臣無所懼。何用讀春秋。

天闕山絕句

散誕愛山客。淒涼懷古心。寒風天闕晚。盡日倚軒吟。

行園樹

松節凌霜久。蓬根逐吹頻。羣生各有性。桃李但爭春。

題雷公井

揜藹愚公谷。蕭寥羽客家。俗人知處所。應爲有桃花。

離歌辭五首

莫折紅芳樹。但知盡意看。狂風幸無意。那忍折教殘。
朝日城南路。旌旗照綠蕪。使君何處去。桑下覓羅敷。
事與年俱往。情將分共深。莫驚容鬢改。只是舊時心。
暫別勞相送。佳期願莫違。朱顏不須老。留取待郎歸。
拂匣收珠佩。迴燈拭薄粧。莫嫌春夜短。匹似楚襄王。

清明日清遠峽作

嶺外春過半。塗中火又新。殷勤清遠峽。留戀北歸人。

自題山亭三首

簪組非無累。園林未是歸。世喧長不到。何必故山薇。
小舫行乘月。高齋臥看山。退公聊自足。爭敢望長閑。
跂石仍臨水。披襟復挂冠。機心忘未得。棋局與魚竿。

竹
以下五首北苑侍宴雜咏

勁節生宮苑。虛心奉豫遊。自然名價重。不羨渭川侯。

松

細韻風中遠。寒青雪後濃。繁陰堪避雨。効用待東風。

水

碧草垂低岸。東風起細波。橫汾從遊宴。何謝到天河。

風

昨朝纔解凍。今日又開花。帝力無人識。誰知玩物華。

菊

細麗披金彩。氛氲散遠馨。汎杯頻奉賜。緣解制頽齡。

景陽臺懷古

後主亡家不悔。江南異代長春。今日景陽臺上。閒人何用傷神。

春夜月

幽人春望本多情。況是花繁月正明。竟夕無言亦無寐。繞階芳草影隨行。
走筆送義興令趙宣輔

聞君孤棹汎荆谿。隴首雲隨別恨飛。杜牧舊居憑買取。他年藜杖願同歸。
九月十一日寄陳郎中

我多吏事君多病。寂絕過從又幾人。前日龍山煙景好。風前落帽是何人。
立秋後一日與朱舍人同直

一宿秋風未覺涼。數聲宮漏日猶長。林泉無計消殘暑。虛向華池費稻粱。
游方山宿李道士房

從來未面李先生。借我西窗臥月明。二十三家同願識。素驂何日暫還城。
柳枝辭十二首

把酒憑君唱柳枝。也從絲管遞相隨。逢春只合朝朝醉。記取秋風落葉時。
南園日暮起春風。吹散楊花雪滿空。不惜楊花飛也得。愁君老盡臉邊紅。

陌上朱門柳映花。簾鉤半捲綠陰斜。憑郎暫駐青驄馬。此是錢塘小小家。
夾岸朱欄柳映樓。綠波平漫帶花流。歌聲不出長條密。忽地風迴見綵舟。
老大逢春總恨春。綠楊陰裏最愁人。舊游一別無因見。嫩葉如眉處處新。
濛濛堤畔柳含煙。疑易陽和二月天。醉裏不知時節改。漫隨兒女打鞦韆。
水閣春來乍減寒。曉粧初罷倚欄干。長條亂拂春波動。不許佳人照影看。
柳岸煙昏醉裏歸。不知深處有芳菲。重來已見花飄盡。唯有黃鸝樹樹飛。
此去仙源不是遙。垂楊深處有朱橋。共君同過朱橋去。密映垂楊聽洞簫。
暫別楊州十度春。不知光景屬何人。一帆歸客千條柳。腸斷東風楊子津。
仙樂春來案舞腰。清聲偏似傍嬌嬈。應緣鸞舌多情賴。長向雙成說翠條。
鳳笙臨檻不能吹。舞袖當筵亦自疑。唯有美人多意緒。解依芳態畫雙眉。

經東都太子橋

綸闈放逐知何道。桂苑風流且暫歸。莫問升仙橋上客。身謀疎拙舊心違。
送客至城西望岡山因寄浙西府中

枚叟鄒生笑語同。莫嗟江上聽秋風。君看逐客思鄉處。猶在岡山更向東。
送寫真成處士入京

傳神蹤迹本來高。澤畔形容婉彩毫。京邑功臣多佇望。凌煙閣上莫辭勞。

附書與鍾郎中因寄京妓越賓

暮春橋下手封書。

海陵橋名

寄向南江問越姑。不道諸郎少歡笑。經年相別憶農無。

留題仙觀

瑤壇醺罷晚雲開。羽客分飛俗士迴。爲報移文不須勒。未曾游處待重來。

奉命南使經彭澤

值王明府不在留此

遠使程途未一分。離心常要醉醺醺。那堪彭澤門前立。黃菊蕭疎不見君。

開阜山

殿影高低雲掩映。松陰繚繞步徘徊。從今莫厭簪裾累。不是乘輅不得來。

朱處士相與有山水之願見送至南康作此以別之

憐君送我到南康。更憶梅花庾嶺芳。多少仙山共遊在。願君百歲尙康強。

和賈員外猷見贈玉藥花栽

瓊瑤一簇帶花來。使斷蒼苔手自栽。喜見唐昌舊顏色。爲君判病酌金盃。

和陳表用員外求酒

暑天頻雨亦頻晴。簾外閒雲重復輕。珍重一壺酬絕唱。向風遙想醉吟聲。
納后侍宴三絕

時平物茂歲功成。重翟排雲到玉京。四海未知春色至。今宵先入九重城。
銀燭金爐禁漏移。月輪初照萬年枝。造舟已似文王事。卜世應同八百期。
漢主承乾帝道光。天家花燭宴昭陽。六衣盛禮如金屋。彩筆分題似柏梁。

柳枝辭十首

座中
應制

金馬辭臣賦小詩。梨園弟子唱新詞。君恩還似東風意。先入靈和蜀柳枝。
百草千花共待春。綠楊顏色最驚人。天邊雨露年年在。上苑芳華歲歲新。
長愛龍池二月時。氍毹金線弄春姿。假饒葉落枝空後。更有梨園笛裏吹。
綠水成文柳帶搖。東風初到不鳴條。龍舟欲過偏留戀。萬縷輕絲拂御橋。
百尺長條宛麴塵。詩題不盡畫難真。憑君折向人間種。還似君恩處處春。
風煖雲開晚照明。翠條深映鳳凰城。人間欲識靈和態。聽取新詞玉管聲。
醉折垂楊唱柳枝。金城三月走金韉。年年爲愛新條好。不覺蒼華也似絲。
新春花柳競芳姿。偏愛垂楊拂地枝。天子徧教詞客賦。宮中要唱洞簫詞。

凝碧池頭蘸翠漣。鳳凰樓畔簇晴煙。新詞欲詠知難詠。說與雙成入管弦。
侍從甘泉與未央。移舟偏要近垂楊。櫻桃未綻梅花老。折得柔條百尺長。

寄題毗陵驛

曾持使節駐毗陵。長與州人有舊情。爲向驛橋風月道。舍人髭鬢白千莖。

春盡日游後湖贈劉起居

劉時方
燒藥

今朝湖上送春歸。萬頃澄波照白髭。笑折殘花勸君酒。金丹成熟是何時。

送察院李侍御使廬陵因寄孟員外

繡衣乘驛急如星。山水何妨寄野情。肯向九霄臺下歇。閒聽孟叟醉吟聲。

聽霓裳羽衣曲送陳君

清商一曲遠人行。桃葉津頭月正明。此是開元太平曲。莫教偏作別離聲。

全五代詩卷二十九

南唐

徐 鉉

鉉字楚金。鉉之弟與鉉齊名。時號二徐。起家祕書郎。齊王景達奏授記室。未幾貶烏江尉。歲餘召還。授右拾遺。集賢殿直學士。論馮魯以祕書郎分司東都。復召爲虞部員外郎。後主立。遷屯田郎。知制誥。集賢殿學士。改官名。拜右內史舍人。賜金紫。宿直光政殿。兼兵吏部選事。開寶七年七月卒。年五十五。贈禮部侍郎。諡曰文。著說文解字系傳四十卷。說文通釋四十卷。方輿記一百三十卷。又古今國賦苑。歲時廣記。及他文章。凡若干卷。

十國春秋。鉉凡四知貢舉。號得人。鉉常著論十餘篇。後主爲丹黃校定。復裒已

所製文。命鉉爲之序。士以爲榮。鉉酷嗜讀書。隆冬烈暑。未嘗少輟。後主一日得周載齊職儀。江東初無此書。人無知者。以訪鉉。一一條對。無所遺忘。其博記如此。既久。處集賢書冊不去手。非暮不出。少精小學。故所讎書尤審諦。每指其家語。人曰。吾惟寓宿于此耳。江南藏書之盛。爲天下冠。錯力居多。後主常嘆曰。羣臣勤其官。皆如徐鉉在集賢。吾何憂哉。宋李穆來使。見錯及鉉。歎曰。二陸之流也。時國勢日削。錯憂憤得疾卒。謂家人曰。吾今乃免爲俘虜矣。談苑。江南時吳淑爲校理。古樂府中有慘字者。淑多改爲操字。蓋草艸之變。錯曰。此非可一例言。若漁陽慘者。二過鼓也。補衡行。漁陽過古歌云。邊城晏聞漁陽慘。黃塵蕭蕭白日暗。淑歎服。慘七變反。又後主悲清暑閣前草生。錯令以桂屑布飄紅中。宿草盡死。謂呂氏春秋桂林之

下無雜木故也。事物紺珠南唐徐氏二龍蓋謂鉉與錯也。玉璽清話錯詞藻尤贗年十歲舉從宴集令賦秋聲詩頃刻而就略云井梧紛墮砌寒雁遠橫空雨滴蓓苔紫風歸薜荔紅盡見秋聲之意。金玉詩話王師弔伐江左城未破時或夢緋衣女子行空中以巨篴篴物散落如豆著地皆成人問之曰此當死于難者後見一貴人盛冠服飄墮于地云徐舍人也既寤聞徐錯歿王文公兄弟在金陵和王微之登黃齋詩押篴字平甫曰當時徐氏撫筆墨夜闌夢墮空中篴此事奇譎而語崛強可謂搏虎手也。

太傅相公以東觀庭梅西垣舊植昔陪盛賞今獨家兄唱和之餘俾令攀和輒依本韻伏愧斐然。
按騎省集徐鉉與太傅殷崇義唱和庭梅詩共三首其一序云史館庭梅見其耄耋末歷載三十今已半枯嘗僚諸公唯相公與鉉在耳觀物興感率成短篇謹書獻上伏惟垂覽詩云東觀婆娑樹曾憐甲坼時縣英共攀折芳歲幾推移往事皆陳迹清香亦暗衰相看宜自喜雙鬢合垂絲其二序云太傅相公深感庭梅再成絕唱曲重借示倍認知憐謹用舊韻攀和詩云禁省繡華地含芳自一時雪英開復落紅藥植還移靜想分今昔頻吟歎盛衰多情共如此爭免髮成絲其三序云太傅相公以庭梅二篇許舍弟同賦再迂藻思曲有虛稱謹依韻奉和庶申感謝詩云舊容終無替流光自足悲攀味感花萼和曲許堪篴前會成春夢何人更已知緣情聊借喻爭敢道言詩錯有和詩二首並錄于此其殷崇義和詩見卷三十六

靜對含章樹。漢有含章發下樹閑思共有時。香隨荀令在。根異武昌移。物性雖搖落。人心豈變衰。唱酬勝笛曲。來往

韻朱絲。

太傅相公與家兄梅花調唱許繼末篇再賜新詩俯光拙句謹奉清韻用感鈞私伏推采覽。

重歎梅花落。非關塞笛悲。論文叨接萼。末曲愧吹簫。枝逐清風動。香因白雪知。陶鈞敷左悌。更賦邵公詩。

賦遠山送鍾德林郎中學士

事見鍾
蒨詩話

瓜步妖氛滅。崐岡草樹青。終朝空爾望。今日送君行。報政秋雲靜。微吟曉月生。樓中長可見。特用滅離情。

同家兄哭喬侍郎

諸公長者鄭當時。事事無心性坦夷。但是登臨皆有詠。未嘗相見不伸眉。生前適意無過酒。死後遺言只要詩。三日笑談成理命。一篇投弔尙應知。

鍾蒨

蒨字德林。豫章人。起家藩府從事。與二徐等遊。累登臺郎。遷集賢殿學士。保大九年爲東都少尹。交泰時。齊王景達都督撫州。朝廷愼選僚佐。除觀察判官校檢屯田郎中。後主時。官勤政殿學士。宋師入金陵。蒨朝服坐于家。兵及門。舉族死之。

騎省集。徐鉉有與弟錯及蕭彧。孫覲。謝仲宣。王沂奉送鍾德林少尹員外并序云。歲辛亥冬十月。天子命吾友

德林爲東府亞尹。大弟諡德蕭君泊諸客饒于石頭城。雲日蒼茫。園林搖落。尊酒將竭。征帆欲飛。處者眷眷而不能迴。行者遲遲而不忍去。煙生暎夕。風靜江平。君子曰。公足以滅私子當促棹。詩所以言志。我當分題。故以風月松竹山石寄情於贈別云爾。賦得石詩云。我愛他山石。中含絕代珍。煙銷寒落落。沙淺靜磷磷。景色辭文陛。清聲出潤濱。扁舟載歸去。知是汎槎人。又鉉與蕭彧。喬彧陳元裕有送鍾德林郎中學士赴東府詩并序云。德林始以才術優贈。入參近司。旋以地望清雅。寵登

齊殿會東畿克復。上以君有遺愛於淮海之都。故輟侍從之班。攝尹正之任。吾一二親友共饒行舟。錢也不才。請以言贈。理大國者意小鮮。言不可撓之也。況亂後乎。德林當本仁守信。體寬務斷。大兵之後。民各思父。聽其自理。任其自營。爲之上者。導其蒙。爲其淫而已。示之以聰明。則民益迷。河之以禁令。則民重困。棄仁則吏暴。失信則衆惑。急則民傷。不斷則民懼。懷此四者。何往而不臧。噫嘻。吾黨皆忘形者也。平生以來。曾會者幾何。思當雞犬相聞。舟輿不接。開口而爭。攜手而游。在吾輩勉之而已。忘身徇國。急病讓夷。德林此行。宜減離戀。盡各賦一物以爲贈乎。九月十七日序。賦得酒詩云。酌此孟中物。榮黃滿把秋。今朝將送別。他日是忘憂。世亂方多事。年加易得愁。政成頻一醉。亦未減風流。

賦山別諸知己

暮景江亭上。雲山日望多。只愁辭輦轂。長恨隔嵯峨。有意圖功業。無心憶薜蘿。親朋將遠別。且共醉笙歌。

賦新鴻別諸同志

隨陽來萬里。點點度遙空。影落長江水。聲悲半夜風。殘秋辭絕漠。無定似驚蓬。我有離羣恨。飄飄類此鴻。

蕭 或

或字文或。官至少卿。

詩話。徐鉉與蕭或。孫覲爲詩友。或。覲卒。後鉉曾有詩悼之。其略云。文或少卿。文山郎中交好深。至二紀已餘。晤別數年。二子。進奉使領表。途次南康。弔孫氏之孤於其家。觀文或手書於僧

室。慷慨悲歎。留題此詩。詩云。孫家虛座弔諸公。張叟門房見手書。二紀歡游今省此。滿衣零淚欲何如。勝聞金印從如斗。鏡裏霜華已滿梳。重遠公應笑我。塵心唯此未能除。

賦月送鍾員外

麗漢金波滿。當年玉帶傾。因思頻聚散。幾復換虧盈。光徹離襟冷。聲符別管清。那堪還目此。兩地倚樓情。

賦菊送德林郎中學士赴東府

離情折楊柳。此別異春哉。含露東籬豔。汎香南浦杯。惜持行次贈。留插醉中迴。暮齒如能制。玉山甘判頽。

孫峴

峴字文山。南康人。官郎中。辟江王景暹記室。

賦竹送鍾員外

萬物中蕭灑。修篁獨逸羣。貞姿曾冒雪。高節欲凌雲。細韻風初發。濃煙日正曛。因題偏惜別。不可暫無君。

謝仲宣

仲宣嘗爲齊王景達宮寮。

賦松送鍾員外

送人多折柳。唯我獨吟松。若保歲寒在。何妨霜雪重。森梢逢靜鏡。廓落見孤峰。還似君高節。亭亭渺繼蹤。

王沂

沂南唐時人。

賦風送鍾員外

靜追蘋末興。況復值蕭條。猛勢資新雁。寒聲伴暮潮。迢山雲散亂。經樹葉飄飄。今日煙江上。征帆望望遙。

喬彞

舜一名匡。舜字亞元。高郵人。李昇輔吳。用爲祕書省正字。及開國。宋齊邱辟置幕中。十餘年。歷大理評事。屯田員外郎。表爲節度掌書記。保大中。召爲駕部郎中。知制誥。中書舍人。以沮國計。流撫州。後主嗣位。復起爲司農少卿。歷殿中監。修國史。給事中。兼獻納使。知貢舉。遷刑部侍郎。老病乞骸骨。後主閱其貧。給俸終身。開寶五年卒。年七十五。諡曰貞。十國春秋。匡舜知貢舉及第。樂史輩五人多見滯名易者。特稱得人。

而少年輕薄。子嘲之。謂之陳橋皮榜。騎省集。徐鉉和亞元長歌中有句云。開緘試讀相思字。乃是多情喬亞元。鉉三篇皆麗絕。小梅寄意情偏切。註云。亞元詩云。借問小梅應得信。春風新自海邊來。此語尤嘉。

賦江送德林郎中學士赴東府

摻袂向江頭。朝宗勢未休。何人乘桂楫。之子過揚州。颯颯翹沙雁。漂漂逐浪鷗。欲知離別恨。半是淚和流。

陳元裕

元裕南唐時人。

賦水送德林郎中學士赴東府

上善湛然秋。恩波洽帝猷。謾言生險浪。豈爽見安流。汎去星槎遠。澄來月練浮。滔滔對離酌。入洛稱仙舟。

孟賓于

賓于字國儀。連州人。晉天福九年登第。還鄉爲馬氏從事。後歸南唐。爲塗陽令。坐繫赦歸。後主

起爲水部員外致仕。初居吉州玉笥山，自號羣玉峰叟。有《金鼈集》。

郡閣雅談：天福中，自湖湘越京洛，應舉，遠人無援，遂下令于華山神珍一

年乞一政。凡六擢，得上上大吉。第一年云：蟠官空手下，澤國更誰來。二年云：水國二親應探榜，龍門三月又傷春。三年云：仙島卻同空說夢，清朝未達自嫌身。四年云：失意從他桃李春，嵩陽經過欲行塵。雲僧不見城中事，問是今年第幾人。五年云：因逢日者教重應，忽被雲僧勸卻歸。天福九年，禮部侍郎符蒙下及第，果大舉，後往江南，官至水部侍郎。王元之嘗云：古詩人有三水部，何遜、張籍及孟賓子也。江南野錄：賓子有詩百篇，獻於李若虛侍郎，其譽譎然。明年與李昉同登進士第，後事李後主，爲滄陽令，抵法當死。會昉還翰林學士，以詩寄賓子，莫學馮唐便休去，明君晚事未爲慚。句後主見昉詩宥之，復官。雅言：述賓子及第獻主司詩云：邪風雨後更聞蟬，溪雨重湖路七千。憶昔故園楊柳岸，全家送上渡頭船。當年中第，興國中致仕歸，祕閣馬致恭送行詩云：今日還家莫惆悵，不同初上渡船頭。蓋用此語。馬詩顏鵬傳：江南野錄作顏謝魯公之後，雅辭翰謹禮法，多循先業，就所居弟侯泉石築亭欄，開軒四敞，則碧鮮最遠，翠微環列，蕭爽之趣，杜絕塵囂。孟賓子嘗以詩美之云：園林蕭爽開來久，欲訪因循二十秋。此日聞詩吟不盡，碧山重疊水長流。詩中言格夏日曲江云：澗樹連沙靜，閑舟人浦遲。贈徐明府云：巖重羣吏散，苔日款庭階。吟窗雜錄柳云：去年曾折處，今日又重條。落花云：早知落處隨疎雨，悔得開時順暖風。又千家：簾幙春空在，幾處樓臺月。自明雪霽云：飄雪化爲流水去，春風吹自好山來。永州法華寺云：匡廬人家猶檻見，還山秋色捲簾看。皆佳句也。鑑戒野錄：賓子子歸唐，寓廬山國學，得瀑布一聯云：練色有窮處，寒聲無盡時。鄰舍有生亦得此句，互證之，助教不能理，因送江州以全篇定之，歸唐勝焉。

蟠溪懷古

良哉呂尚父，深隱始歸周。釣石千年在，春風一水流。松根盤石，花影臥沙鷗。誰更懷韜術，追思古渡頭。

晚眺

倚杖殘秋裏。吟中四顧頻。
西風天際雁。落日渡頭人。
草色衰平野。山陰歛暮塵。
卻尋苔徑去。明月照村鄰。

懷連上舊居

閑思連上景難齊。樹繞仙鄉路繞溪。
明月夜舟漁父唱。春風平野鷓鴣啼。
城邊寄信歸雲外。花下傾杯到日西。
更憶海陽垂釣侶。昔年相遇草萋萋。

公子行

錦衣紅奪彩霞明。侵曉春遊向野庭。
不識農夫辛苦力。驕驄踢爛麥青青。

湘江亭

獨宿大中年裏寺。樊籠得出事無心。
寒山夢覺一聲磬。霜葉滿林秋正深。

題梅仙館

仙界路遙雲縹緲。古壇風冷葉蕭騷。
後來豈合言淹滯。一尉昇騰道最高。

左 偃

偃南唐人。不仕居金陵。能詩。有鍾山集。

雅言雜錄。江南韓熙載稱左偃能詩。有集千餘首。昭君怨云。胡笳聞欲死。漢月望還生。早日云。日華離碧海。雲影散青天。

寄廬山白上人

潦倒門前客。閑眠歲又殘。連天數峯雪。終日與誰看。萬丈高松古。千尋落水寒。仍聞有新作。嬾寄入長安。

寄韓侍郎

謀身謀隱兩無成。拙計深慙負耦耕。漸老可堪懷故國。多愁翻覺厭浮生。言詩幸遇明公許。守朴甘遭俗者輕。今日況聞搜草澤。獨悲顛顚臥昇平。

漢宮詞

寒燭照清夜。笙歌隔薜牆。一從飛燕入。使不見君王。

送君去

關河月未曉。行子心已急。佳人無一言。獨背殘燈泣。

秋晚野望

倚筇聊一望。何處是秦川。草色初晴路。鴻聲欲暮天。

郊原晚望懷李祕書

歸鳥入平野。寒雲在遠村。徒令睇望久。不復見王孫。

言懷別同志

漸老將誰託。勞生每自慙。何當重攜手。風雨滿江南。

江上晚泊

寒雲淡淡天無際。片帆落處沙鷗起。水闊風高日復斜。扁舟獨宿蘆花裏。

寄鑒上人

一從攜手阻戈鋌。屈指如今已十年。長記二林同宿夜。竹齋聽雨共忘眠。

送人

一莖兩莖華髮生。千枝萬枝梨花白。春色江南獨未歸。今朝又送還鄉客。

李詢

詢南唐人。

贈織人

札札機聲曉復晡。眼穿力盡竟何如。美人一曲成千賜。心裏猶嫌花樣疎。

曾庶幾

庶幾吉水人。南唐時隱士。

能改齋漫錄。庶幾在五代時。中朝累有聘召。皆不起。故老有能記其放猿絕句云云。

放猿

孤猿鎖檻歲年深。放出城南百丈林。綠水任君連臂飲。青山不用斷腸吟。

李匡堯

匡堯泰和人南唐布衣

元章書宋齊邱鎮鍾陵有布衣李匡堯累贊謁宋宋知其忤物託以他故不見一日宋喪子匡堯隨吊客造謁乃就賓次大署二十八字云云

安排唐祚挫強吳盡見先生說廟謨今日喪雛猶自哭讓皇宮眷合何如

按此詩一作李家明詩詞句小異

周顥

顥南唐處士

南唐近事顥洪儒奧學偶不中第旅浙西從事歡飲惟味章程座中皆戲之有贈詩云龍津棹尾十年勞聲價當時鬪月高惟有紅妝回舞手似持霜刃向猿猴周和云云

和韻

十載文場敢憚勞宋都回鷁爲風高今朝甘被花枝笑任道樽前愛縛猿

張紹

紹南唐人

冲佑觀

大始未形混沌無際上下開運乾坤定位日月麗天山川鎮地萬彙猶屯三才始備肇有神化初生蒸民上惟立德下無疎親皇風蕩蕩黔首淳淳天下有道誰非聖人開源嗜慾澆漓俗盛賢者避世真人華命八極神鄉十州異境翠阜丹邱潛伏靈聖惟彼武夷實曰洞天峯巒黛染巖岫霞鮮金房玉室羽蓋雲輶葬日風雨會有神仙國步多艱皇綱中絕四海九州瓜分幅裂稔禍陬隅阻兵甌越寂寞蠻風荒涼絳闕

赫赫烈祖再造丕基。拱揖高讓。神人樂推。明明我后。允協昌基。功崇下武。德茂重熙。睿哲英斷。雄略神智。拓土開疆。經天緯地。五嶺來庭。三湘清徹。四海震威。羣生懷惠。猶勞宵旰。猶混馬車。貪狼俟靜。宮焉方除。淹留駿馭。想像鶉居。心懸真洞。夢到華胥。乃眷名山。追惟聖跡。內庫頒金。元侯奉職。三境求規。五靈取則。跨谷彌岡。張霄架極。珠宮寶殿。璇臺玉堂。鳳翔高臺。龍轉迴廊。錯落金碧。玲瓏壁璫。雲生林楚。雷繞藩牆。七聖斯嚴。三君如在。八景靈輿。九華神蓋。清霄莫眇。明霜匪對。彷彿壺中。依稀物外。衆眞之宇。擬之無倫。會仙之類。名之惟新。高峰爲壑。區谷成峒。皇獻頌聲。永絕淄磷。

李貞白

貞白南唐人爲百勝軍節度陳德誠客。

全唐詩話貞白善諧謔刺蝟云行似鍼氈動臥若栗毬圓莫欺如此人誰敢便行拳又詠月云當塗當塗見燕湖燕湖見八月十五夜一似

沒柄扇又詠狗蚤云與蝨都來不較多撮挑筋斗太嚙囉忽然管著一藍子有甚心情那何又詠罌粟子云倒排雙陸子希撥碧牙髻既似鑽牛乳又如鈴馬兜鼓搥井瀑箭直是有來由又謁貴公子不禮書格子屏風云道格何曾格言糊又不糊漁身總是眼還解識人無又建帥誨之子德誠罷管沿江水軍入掌禁衛頗患拘束方宴客貞白在坐食蟹德誠顧貞白曰請詠之貞白云衆客皆笑調元拉王漁洋五代詩話詠蟹詩作王貞白考唐詩戊鑑王貞白無爲陳德誠客事今

據全唐詩仍歸

李貞白爲是

詠蟹

蟬眼龜形腳似蛛。未曾正面向人趨。如今釘在盤筵上。得似江湖亂走無。

陳 沆

沆南唐時廬阜處士。

全唐詩話。沆寒食云。罷卻兒女戲。放他花木生。又閑居云。掃地雲粘帚。耕山鳥怕牛。又頤水云。點入旱雲千國仰。力浮塵世一毫輕。

嘲廬山道士

南唐近事。廬山九天使者廟。有一道士。體貌魁偉。飲啗酒肉。晚節服餌。丹砂躁于冲舉。有鶴因風所飄。憩于廟庭。道士驚喜。謂當赴昇騰之召。令山童控而乘之。羽儀清弱。不勝其載。毛傷骨折而斃。翌日馴養者知縣

于公府沆以詩嘲之。

調元按十國春秋作孟蜀向瓚詩未知孰是今并存之。

啗肉先生欲上昇。黃雲踏破紫雲崩。龍腰鶴背無多力。傳與麻姑借大鵬。

全五代詩卷三十

南唐

王貞白

貞白字有道。信州永豐人。五舉禮部。登乾寧二年第。後七年始授校書郎。晚歸南唐。嘗與羅隱、貫休唱和。所著有靈溪集。

紀事。天祐年中內試。貞白札翰狼藉。帝覽。拂下玉案。有黃門女。此舉人頗有詩名。御批曰。粗通放。青瑣後集。貞白唐末大播詩名。嘗作御溝詩云。一片御溝水。綠槐相蔭清。

此波涵帝澤。無處瀟灑纓。云云。以示貫休。貫休曰。剩一字。貞白揭袂而去。貫休預書一中字于掌邊。巡。貞白曰。此中涵帝澤。貫休開掌示之。不異所改。老學菴續筆記。唐有一種色。謂之退紅。王建牡丹詩云。粉光深紫膩。肉色退紅嬌。貞白倡樓行云。龍腦香調水。教人染退紅。花間集。床上小薰籠。昭州新退紅。蓋退紅若今之粉紅。髹器亦有此色者。今無之矣。紹興末。繡品有一等似皂而淡者。謂之不肯紅。亦退紅之類也。據言。昭宗皇帝頗爲寒進開路。崔凝典貢舉。濫得不少。然如王貞白。張蠙律詩。趙觀文古風之作。皆臻前輩之闢闔者。洪景廬云。貞白靈溪集。藏永豐邑士周宗朴家。更無他本。鄆陽余鏞。攝尉訪得刻之。

放歌行

南渡洛陽津。西望十二樓。明堂坐天子。月朔朝諸侯。清樂動千門。皇風被九州。慶雲從東來。泱泱抱日流。昇平貴論道。文墨將何求。有詔徵草澤。微誠將獻謀。冠冕如星羅。拜揖曹與周。望塵非吾事。入職且遲留。

辛蒙國士識。自脫負薪裘。今者放歌行。以慰梁甫愁。位榮數斗祿。奉義本豐羞。願得金膏遂。飛雲亦可籌。

長安道

曉鼓人已行。暮鼓人未息。梯航萬國來。爭先貢金帛。不問賢與愚。但論官與職。如何貧書生。只獻安邊策。

洛陽道

喧喧洛陽路。奔走爭先步。惟恐着鞭遲。誰能更迴顧。覆車雖在前。潤屋何曾懼。賢哉只二疏。東門挂冠去。

田舍曲

古今利名路。只在儂門前。至老不離家。一生常晏眠。牛羊晚自歸。見童戲野田。豈思封侯貴。唯只待豐年。征賦豈辭苦。但願時官賢。時官苟貪濁。田舍生憂煎。

擬塞外征行

寇騎滿雞田。都護欲臨邊。青泥方絕漠。懷劍始辭燕。旌旗挂龍虎。壯士募鷹鷂。長城威十萬。高嶺奮三千。行行向馬邑。去去指祁連。鼓聲遙赤塞。兵氣遠衝天。對陣雲初上。臨城月始懸。風驚烽易滅。沙暗馬難前。恩重恆思報。勞心屢損年。微功一可立。身輕不自憐。

長門怨二首

寂寞故宮春。殘燈曉尚存。從來非妾過。偶爾失君恩。花落傷容鬢。鶯啼驚夢魂。翠華如可待。應免老長門。

第三句唐音戊籤

作從來非妾妬

葉落長門靜。苔生永巷幽。相思對明月。獨坐向空樓。鸞駕迷終轉。蛾眉老自愁。昭陽歌舞伴。此夕未知秋。

妾薄命

薄命頭欲白。頻年嫁不成。秦娥未十五。昨夜事公卿。豈有機杼力。空傳歌舞名。妾專修婦德。媒氏卻相輕。

長相思

芙蓉出水時。偶爾便分離。自此無因見。長教挂所思。殘春不入夢。芳信欲傳誰。寂寞秋堂下。空吟小謝詩。

少年行二首

遊讌不知厭。杜陵狂少年。花時輕暖酒。春服薄裝綿。戲馬上林苑。鬪雞寒食天。魯儒甘被笑。對策鬢皤然。

弱冠投邊急。驅兵夜渡河。追奔鐵馬走。殺虜寶刀拖。

音靴。威靜黑山路。氣含。

一作吞。

青海波。常聞爲突騎。天子賜長戈。

短歌行

物候來相續。新蟬送晚鶯。百年休倚賴。一夢甚分明。金鼎神仙隱。銅壺晝夜傾。不如早立德。萬古有其名。

湘妃怨

舜欲省轡陬。南巡非逸遊。九江沈白日。二女泣滄洲。目極楚雲斷。恨深湘水流。至今聞鼓瑟。咽絕不勝愁。

出塞曲

歲歲但防虜。西征早晚休。匈奴不繫頸。漢將但封侯。夕照低烽火。寒笳咽戍樓。燕然山上字。男子見須羞。

御溝水

一帶御溝水。綠槐相蔭清。此中涵帝澤。無處濯塵纓。烏道來雖險。龍池到自平。朝宗本心切。願向急流傾。

度關山

只領千餘騎。長驅磧邑間。雲州多警急。雪夜度關山。石響鈴聲遠。天寒弓力慳。秦樓休悵望。不日凱歌還。

出自薊北門行

薊北連極塞。塞色晝冥冥。戰地骸骨滿。長時風雨腥。沙河流不定。春草凍難青。萬戶封侯者。何謀靜虜庭。

古悔從軍行

憶昔仗孤劍。十年從武威。論兵親玉帳。逐虜過金微。隴水秋先凍。關雲寒不飛。辛勲功業在。麟閣志猶違。

遊仙

我家三島上。洞戶枕波濤。醉背雲屏臥。誰知海日高。露香紅玉樹。風綻碧蟠桃。悔與仙子別。思歸夢釣鰲。

商山

商山名利路。夜亦有人行。四皓臥雲處。千秋疊薜生。晝烟籠澗黑。殘雪隔林明。我待酬恩了。來聽水石聲。

廬山

嶽立鎮南楚。雄名天下聞。五峰高閣日。九疊翠連雲。夏谷雪猶在。陰巖晝不分。唯應嵩與華。清峻得爲羣。
寄鄭谷

五百首新詩。緘封寄去時。祇憑夫子鑒。不要俗人知。火鼠重收布。冰蠶乍吐絲。直須天上手。裁作領巾披。
白牡丹

穀雨洗纖素。裁爲白牡丹。異香開玉合。輕粉泥銀盤。曉貯露華溼。宵傾月魄寒。家人淡粧罷。無語倚朱欄。
送韓從事歸本道

獻捷靈州倅。歸時寵拜新。論邊多稱旨。許國誓亡身。馬渴黃河凍。雁回青塚春。到蕃唯促戰。應不肯和親。
暗劉凝評事

棘寺官初罷。梁園靜掩扉。春深顏子巷。花映老萊衣。談史曾無滯。攻書已造微。卽膺新寵命。稱慶向庭闈。
雲居長老

巖路踰雲上。來叅出世僧。松高半巖雪。竹覆一溪冰。不說有爲法。非傳無盡燈。了然方寸內。應祇見南能。
雨後從陶郎中登庾樓

庾樓逢霽色。夏日欲西曛。虹截半江雨。風驅大澤雲。島邊漁艇聚。天畔鳥行分。此景堪誰畫。文翁請綬人。
述松

遠谷呈材幹。何由入棟梁。歲寒虛勝竹。功績不如桑。秋老落乾子。春深衰嫩黃。雖蒙匠者顧。樵採日難防。

從軍行

從軍朔方久，未省用干戈。
祇以恩信及，自然戎虜和。
邊聲動白草，燒色入枯河。
每度因看獵，令人勇氣多。

胡笳曲

隴底悲笳引，隴頭鳴北風。
一輪霜月落，萬里塞天空。
戍卒淚應盡，胡兒哭未終。
爭教班定遠，不念玉關中。

出塞

玉殿論兵事，君王詔出征。
新除羽林將，曾破月支兵。
慣歷塞垣險，能分部落情。
從今一戰勝，不使虜塵生。

晚夏逢友人一作李昌符詩

一別同袍友，相思已十年。
長安多在客，久病忽聞蟬。
驟雨纔沾地，陰雲不徧天。
微涼堪話舊，移榻晚風前。

終南山

終朝異五岳，列翠滿長安。
地去搜揚近，人謀隱遁難。
水穿諸苑過，雪照一城寒。
爲問紅塵裏，誰同駐馬看。

涼州行

誰唱關西曲，寂寥夜景深。
一聲長在耳，萬恨重經心。
調古清風起，曲終涼月沉。
卻應筵上客，未必是知音。

金陵懷古二首

特險不種德，興亡嘆數窮。
石城幾換主，天塹漫連空。
御路疊民塚，臺基聚牧童。
折碑猶有字，多記昔英雄。

六代江山在，繁華古帝都。
亂來城不守，戰後地多蕪。
寒日隨潮落，歸帆與鳥孤。
興亡多少事，回首一長吁。

釣臺

異代有巢許。方知嚴子情。舊交雖建國。高臥不求榮。水鳥寒來浴。汀蘭暖重生。何顏吟過此。辛苦得浮名。

憶張處士

天台張處士。詩句造元微。古樂知音少。名言與俗違。山風入松徑。海月上巖扉。畢世唯高臥。無人說是非。

送馬明府歸山

辭秩入匡廬。重修靖節居。免遭黑綬束。不與白雲疎。送吏各獻酒。羣兒自擔書。到時看瀑布。爲我謝清虛。

送友人南歸

南國菖蒲老。知君憶釣船。離京近殘暑。歸路有新蟬。峴首白雲起。洞庭秋月懸。若教吟興足。西笑是何年。

題嚴陵釣臺

山色四時碧。溪聲七里清。嚴陵愛此景。下視漢公卿。垂釣月初上。放歌風正輕。應憐渭濱叟。匡國正論兵。

曉泊漢陽渡

落月臨古渡。武昌城未開。殘燈明市井。曉色辨樓臺。雲自蒼梧去。水從蟠冢來。芳洲號鸚鵡。用記禰生才。

隨計

徒步隨計吏。辛勤鬢易凋。歸期無定日。鄉思羨迴潮。冒雨投前驛。侵星過斷橋。何堪穆陵路。霜葉更蕭蕭。

宮池產瑞蓮

雨露及萬物。嘉祥有瑞蓮。香飄雞樹近。榮占鳳池先。聖日臨雙麗。恩波照并妍。願同指佞草。生向帝堯前。

秋日旅懷寄右省鄭拾遺

永夕愁不寐。草蟲喧客庭。半窗分曉月。當枕落殘星。鬢髮遊梁白。家山近越青。知音在諫省。苦調有誰聽。

九日長安作

無酒泛金菊。登高但憶秋。歸心隨旅雁。萬里在滄州。殘照明天闕。孤砧隔御溝。誰能思落帽。兩鬢已添愁。

曉發蕭關

早發長風裏。邊城曙色間。數鴻寒背磧。片月落臨關。隴上明星沒。沙中夜探還。歸程不可問。幾日到家山。

寄天台葉尊師

師住天台久。長聞過石橋。晴峰見滄海。深洞徹丹霄。採藥霞衣溼。煎芝古鼎焦。念予無俗骨。頻與鶴書招。

江上吟

一葉野人舟。長將載酒游。夜來吟思苦。江上月華秋。曉露滿紅蓼。輕波颺白鷗。漁翁似有約。相伴釣中流。

過商山

一宿白雲根。時經採麝村。數峰雖似蜀。當畫不聞猿。馬立溪沙淺。人爭閣道喧。明朝棄襦羅。步步入金門。

泛鏡湖

我泛鏡湖日。未生千里葦。時無賀賓客。誰識謫仙人。吟對四時雪。憶遊三島春。惡聞亡越事。洗耳大江濱。

書陶潛醉石

片石陶真性。非爲麴蘖昏。爭如累月醉。不笑獨醒人。積疊莓苔色。交加薜荔根。至今重九日。猶待白衣魂。

芍藥

芍藥承春寵。何曾羨牡丹。麥秋能幾日。穀雨只微寒。妬態風頻起。嬌妝露欲殘。芙蓉浣紗伴。長恨隔波瀾。

獨芙蓉

方塘清曉鏡。獨照玉容秋。蠟蕊不相採。歛頰空自愁。日斜還顧影。風起強垂頭。芳意羨何物。雙雙鸕鶚游。

馮氏書齋小松二首

孤根生遠岳。移植翠枝添。自秉雪霜操。任他蜂蝶嫌。微陰連迴竹。清韻入疎簾。聳勢卽空碧。時人看莫厭。得地已經歲。清音晝夜聞。根涵舊山土。葉間近溪雲。野鶴望長遠。庭花笑不羣。須知搖落後。衆木始能分。

蘆葦

高士想江湖。湖閑庭植蘆。清風時有至。綠竹興何殊。嫩喜日光薄。疎憂雨點麤。驚蛙跳得過。門雀島如無。未織巴籬護。幾擡叩竹扶。惹烟輕弱柳。醺水漱清蒲。旣灌情偏重。琴樽賞不孤。穿花思釣叟。吹葉少羌雛。寒色暮天映。秋聲遠籟俱。朗吟應有趣。瀟洒十餘株。

洗竹

道院竹繇教略洗。鳴琴酌酒看扶疎。不圖結實來雙鳳。且要長竿釣巨魚。錦籜裁冠添散逸。玉芽修饌稱

清虛有時記得三天事。自向琅玕節下書。

庾樓曉望

獨凭朱檻亦凌晨。山色初明水色新。竹霧曉籠銜嶺月。蘋風暖送過江春。子城陰處猶殘雪。衙鼓聲前未有塵。三百年來庾樓上。曾經多少望鄉人。

送芮尊師

石上菖蒲節節靈。先生服食得長生。早知避世憂身老。近日登山覺步輕。黃鶴待傳蓬島信。丹書應換紫宮名。他年控鯉昇天去。廬岳通民願從行。

仙巖二首

白烟晝起丹竈。紅葉秋書篆文。二十四巖天上。一雞啼破晴雲。風呼山鬼服役。月照衡薇結花。江煖客尋瑤草。洞深人嘯丹霞。

折楊柳三首

枝枝交影鎖長門。嫩色曾沾雨露恩。鳳輦不來春欲盡。空留鶯語到黃昏。水殿年年占早芳。柔條風裏御爐香。如今萬垂多巡狩。輦路無陰綠草長。嫩葉初齊不耐寒。風和時拂玉蘭干。征人去日曾攀折。泣雨傷春翠黛殘。

御試後進詩

三時賜食天廚近。再宿偷吟禁漏清。二十五家齊拔宅。人間已寫上昇名。是年初放二十五人。後覆汰。正放十五人。

春日詠梅花

靚粧纔罷粉痕新。迢曉風迴散玉塵。若遣有情應恨望。已兼殘雪又兼春。

